

EKALESIA FAAPOTOPOTOGA KERISIANO SAMOA

TUSI MO MATAUPU AUTALAVOU

2018



AUTALAVOU MATUTUA

MATAGALUEGA O A'OA'OGA KERISIANO

UPU TOMUA.

I le suafa mamalu o Iesu Keriso le Ao o le Ekalesia, e faatalofa atu ai i le paia o le Ekalesia Faapotopotoga Kerisiano Samoa i ona tulaga faalupeina. E faafeiloa'i faapitoa i le mamalu o Aualavou, Susuga i Faatamā & Faatinā, Afioga Peresetene, Sui Peresetene/Ta'ita'i, le au mau tofi o Failautusi, Teutupe, Sui o Alii & Sui o Tamaita'i, ae maise o sui auai uma o le Aualavou. O le Tusi Aoga leni o le 2018. E toe faamanatu mo le silafia:

1. O leni Tusi mo Faia'oga o A'oga Aso Sa, o le meatotino a le Ekalesia Faapotopotoga Kerisiano Samoa ua saunia faapitoa mo ana Aoga Aso Sa ma Aualavou. E avanoa foi mo le fa'aaogāina e soo se tagata e tusa o lea faamoemoe. Peita'i e faasāina faaletulafono ona toe lomina e se tasi, o se vaega po o le tusi atoa, mo le faamoemoe e maua ai ni ana faamanuiaga ma ni tamaoa'iga faaletino, e aunoa ma le faatagaga a le EFKS.

2. Ua maua ata o Tusi Aoga Aso Sa & Aualavou 2018 i le Upega Tafailagi (website) a le EFKS: www.cccs.org.ws. Faamolemole faafeso'ota'i mai lo tatou Ofisa i Mulinuu, telefoni 24340, poo le e-meli: xtneduc@cccs.org.ws mo fesoasoani ma nisi faamatalaga.

3. E faamauina le faafetai i puna'oa ma upega tafailagi na maua mai ai nisi fesoasoani e pei o faamatalaga ma ata, mo le tapenaga o nei Tusi A'oga.

4. E leai se suiga i Auala ma Metotia e a'oa'oina ai mataupu mai tausaga talu ai. E tāua ai le teu faalelei pea o Tusi Aoga o tausaga ua mavae e silasila i ai pe a mana'omia. E maualuga le manatu o le Matagaluega i le tofa saili ma le tofa taulagalaga ma faama'ite o susuga i Faiaoga Aoga Aso Sa & Ta'ita'i Aualavou, e fa'aaogā ai

taleni ma agavaa o meaalofa a le Atua ua ia i latou, i le faatinoga o le faiva faa-faiaoga.

5. O vaega masani o le Faatinoga o Mataupu e pei o Tatalo Amata, Faafeiloa'i le Vasega, Faamanatu Mataupu talu ai, Tatalo faapa'ia le foa'i, Tatalo Faai'u ma isi, ua lē o tusia i le faasologa o mataupu i Aso Sa taitasi. Peitai o vaega masani nei o le faatinoga o mataupu e **tatau lava ona fai i Mataupu o Aso Sa taitasi.**

6. Afai ua lape le faatinoga o lenei galuega, e matua atu i la outou tofā faaleAtua e magalo ai le afaigaluega vaivai. Pe afai foi e i ai ni fautuaga mo le faaleleia atili o lenei galuega, faamolemole faafesoota'i mai lo tatou Ofisa i tuatusi o i luga, pe lafo mai i le Pusa Meli 163, Apia.

7. O lenei Tusi mo Autalavou 2018, na saunia e Susuga Enoka Aperamo FS, Apelu Pula FS, Lemoa Taga AF, Nanai Elia AF.

8. Ia faamanuia le Atua i le galuega o lenei tausaga, auā le a'oa'oina o alo ma fanau i le Autalavou ina ia latou OLA IA KERISO.

Soifua ma ia manuia.

O la outou auauna,

Faitoaga Tolua

(Faatonu A'oa'oga Kerisiano)

MATAUPU AUTALAVOU 2018

Ianuari	28	Ia ola ia Keriso
Fepuari	4	O le la o le vaa
	11	Aperaamo le tama o le 'au faatuatua
	18	O le valaauina o Ieremia
	25	O le aiga o Aperaamo
Mati aiga	4	O le tāua o le tausī lelei o matua tausī
	11	O le Atua ma le mativa o le tagata
	18	Ua galala le Tuimanua, ua fiainu foi
Tavita	25	Finauga (Debate)
Aperila	1	O auga tamā o le Tusi Paia
	8	Lufilufiina o mea taumafa
	15	Ua mafua i se a ona toatele tupulaga o le E.F.K.S. ua o ese atu i isi tapuaiga?
	22	O faiga uō
	29	Ui le ula
Me	6	O le uii faamaumau'oa
	13	(Aso Sa o tinā) O le tāua o tinā
	27	Aperaamo ma le taulaga i Moria
Iuni	3	O faataoto a Iesu
	10	O lou tagata lilo
	17	Numera o le Tusi Paia
	24	O Iosefa le faamatala miti
Iulai	1	O Aperaamo sa filifilia e le Atua
	8	Pe mafai ona tatou faafoe le ita?

	15	A matua le tuinanau ua fanau le agasala, a matua le agasala ua fanau le oti
	22	O le avea ma soo moni o Keriso
	29	Aisea e mafua ai le Pule i le Ola?
Aokuso	5	Aganuu – O lo’u nuu
	12	(Aso Sa o Tamā) O le alofa o Tavita ia Apisaloma
	19	O folafolaga ia Aperaamo
	26	Aganuu – O le ‘Ava
Setema	2	(Aso Sa Tala Lelei) Amiotonu ma Taulaga
	9	Aisea ua tepa ai i tua le avā a Lota?
	16	Ua sola Iona i Tasesa
	23	O le faaipoipoga i Kana i Kalilaia
	30	Aisea e toasa ai le Atua i le tagata?
Oketopa	28	O a’u
Novema	4	O le mea e luluina e le tagata, e toe seleseleina e ia.
	11	O faataoto i le mina
	18	O tusitusiga i le palapala
	25	O le uu nato i totonu o le fagu alapasa
Tesema	2	O tu ma amioga fa’aaloalo e tausisi i ai
	9	O le toe foi o Iuta
	16	O meaalofoa a le au makoi

ASO SA: 28 IANUARI 2018

MATAUPU: IA OLA IA KERISO

Ao lei amataina feau ma galuega faa Autalavou o lenei tausaga, e manatu o se avanoa taua lenei e toe to manatu ai le Autalavou i le uiga o le fuaitau ua fai nei ma mau tauave a Autalavou E.F.K.S: *IA OLA IA KERISO*. O le Ola Ia Keriso, o le ola faatuatua lea i le Atua e pei ona faamamafa i tusitusiga o le Feagaiga Tuai. Ae ua fa’aaoga KERISO, ona o le lagona, o lea ua tatou i ai i le Feagaiga Fou ina ua toe tu manumalo Iesu i le oti ma le tuugamau.

FAATINOGA O LE MATAUPU:

1. Fetufaai le Autalavou i le aano moni ua afua ai ona avea lea fuaitau: *IA OLA IA KERISO* ma mau tauave a Autalavou EFKS.
2. Sailiili i ni tala o le Tusi Paia o taua ai talavou o loo atagia i o latou olaga le uiga moni o lea mea o le *OLA IA KERISO* – tusa lava poo ni tala o le Feagaiga Tuai.

FESOASOANI MO LE FAIAOGA:

Ia Ola Ia Keriso: O le faamoemoe maualuga, ia avea Iesu Keriso ma faataitaiga o olaga o tupulaga talavou EFKS. O lona uiga, o mea lelei uma na a’oa’oina ma faatinoina e Iesu Keriso, o uiga ia e tatau ona savavali ai tatou fanau.

Nisi o talavou o le Tusi Paia:

1. *Tavita*: O Tavita, o le uii o le fanauga a Iese. *O se talavou loto tele i mea lelei*. O lona le fefe ma le faatuatua i le Atua, na ia faatoilalo ai Koliata le toa o Filisitua. Na filifilia e fai ma tupu o Isaraelu. Na iloga foi le loto atu o Tavita i le Atua. E ui i lona sese ma le agasala na ia faia, ae na ia lagona lava le salamo ma toe foi i le Atua.

2. *Isaako*: O le atalii e toatasi o Aperaaamo. E iloga tala o Isaako i lona usitaia o le faatonuga a lona tama o Aperaaamo i le taimi na o ai e osi le taulaga. E le o matuā manino mai le tala le ola usiusitai o Isaako. Peitai, a manatu i le gaioga ua fai e Aperaaamo, o le saisaia o lona atalii ma sii i luga o le fata faitaulaga e sauni ai le taulaga, o se gaioga e mafo ai le loto i lona ooga pe ana taunuu, ae leai ma se tala a Isaako. *Ia avea i tatou o ni tupulaga talavou e ola usiusitai i matua ma tagata matutua ae sili ai le ola usiusitai i le Atua.*

3. *Iosefa*: O Iosefa o le pele a Iakopo. O le uii ia o le fanauga. Na agaleaga ona uso ma faatau ese atu o ia i tagata Mitiana ma iu ai le olaga o Iosefa i Aikupito. Ina ua oo ane le oge i Kanana, na faatonu ai e Iakopo lana fanau e saili fesoasoani i Aikupito mo ni meaai, ma le lilo i manatu o Iosefa o loo pulea le tamaoiga o Aikupito. Na iloa lelei lava e Iosefa ona uso ia ua oo atu, peitai, ua le tau le agaleaga ia te ia, ae ua ia naunau e mafuta ma i latou. Na taunuu lava le fa'amoemoe o Iosefa, ina ua ia tautino ma fai atu: “o au o Iosefa lo outou uso, aua le popole, o le Atua na aumaia au iinei”. *Tasi lea vaaiga e iloa ai le tupulaga talavou e ola ia Keriso: e ola faamagalo.*

4. *Timoteo*: O le atalii faaleagaga o le Aposetolo o Paulo i le faatinoina o le galuega tala'i e pei ona fita i ai Paulo i Ekalesia ma tausaga e tele. O loo iloa lava i tusitusiga a Paulo lona faalototele ma le faamalosi ia Timoteo, ina ia faamuamua le finagalo o le Atua. O le faamoemoe lea o lo tatou i ai i Aualavou: *ia faamuamua le finagalo o le Atua.*

5. *Iesu*: O Iesu Keriso le faaitaiga sili o soo se amioga ma faatinoga e tatau mo i tatou le tupulaga talavou.

Faamanatu: O le ola ia Keriso e iloa i faatinoga o aso uma.

ASO SA: 4 FEPUARI 2018

MATAUPU: O LE LA O LE VAA

O le soifuaga lenei o loo faatusaina i se folauga o loo faia. O i tatou o tagata folau mo le malo o le Atua. Ao le fesili, o le a le laau e tatau ona la ā'i o tatou vaa ina ia taunuu manuia la tatou folauga faale faatuatua?

FAATINOGA O LE MATAUPU:

1. Faitau ma manino i le tala ua filifilia o lenei Aso Sa.
2. Saili ni a'oa'oga tāua e maua mai le tala ua faatauina.
3. Manatunatu i le fesootaiga o lenei tala faa-Samoa ma le talitonuga o le au Kerisiano e uiga i ni laau e tatau ona la 'ai o tatou vaa.
4. Saunia ni kopi o tala ua saunia mo le silafia e le Autalavou.

TALA:

Na fougou malaga mai le fanau a Tagaloa i Samoa, a o nonofo i Manua ona fai atu lea o Tagaloa i lana fanau afai e te lua fia saogalemu mo la oulua malaga, ona lua o lea e saili mai se laau e fai ai le la o le vaa lua te malaga ai.

Ua faalagai le o a tama i le vao. Ua alu le aso o tau saili se laau ona maua loa lea e tama o le laau o le toa. O le laau lenei o le toa o se laau sili lea ona malo ma anagata o le vao, ai foi o le mafuaaga lea ua filifili ai e tama e fai ai le la o lo la vaa.

Ua vaai atu Tagaloa o amo mai le laau ua oo mai le laau o le toa. Ua fiafia lava nai tama ma le manatu ua talia e lo la tamā le toa e fai ma la o lo la vaa. Peita'i e le'i taliaina e Tagaloa, ua fai atu Tagaloa ou te le manao e fai le la o lo oulua vaa i lenei laau malo, auā e faatau matagi ma e iu lava i le gau. A ia lua o e sue mai se fau e la ai lo oulua vaa, auā e fetai ma le matagi e lolo lava i ai ma e le faatau matagi e usitai lava ma lolo i le

mea e agi i ai le matagi, ona toe o loa lea o tama. Ua sue mai le fau ua fai ai le la o lo la vaa, ua malaga mai le vasa, tiga le tetele o matagi ae folau lava ma le fiafia auā ua usitai le la i le mea e agi i ai le matagi.

FESOASOANI MO LE FAIAOGA:

O nisi nei o a’oa’oga e mafai ona maua mai le tala:

Fesili 1.

1. E lē aogā ni laau faatau matagi e fai ai la o vaa folau.
2. E manuia ma taunuu fiafia ni faigamalaga e fa’aaogā laau e lolo gofie i le matagi e la ‘ai o latou vaa.

Fesili 2.

1. O le fa’amoemoe o lo tatou i ai i le Autalavou, ia avea i tatou o ni talavou e manuia ai aiga, nuu, atunuu, aulotu ma le Tala Lelei a le Atua. O lona uiga, e tatau ona tatou folau i ni la e lolo gofie i le matagi, ina ia taunuu i le manuia le tatou folauga i le malo o le Atua.
2. Aumai le la o le lotomauualalo, o le loto faamagalo, o le faamaoni, o le alofa, o le onosai, o le faapalepale ma isi lava uiga lelei e la ‘ai lo tatou vaa.
3. Tuu le loto malosi ma le faamaualuga e lē aogā. E lē aogā le la o le faasausili ma le manatu faapito, auā o la faatau matagi ia, e afatia ai la tatou folauga faale faatuatua.
(faapoopo i ai ma nisi a’oa’oga e manatu i ai le Autalavou)

Faamanatu: Tautai pea Iesu i le tatou folauga faale faatuatua.

.....

ASO SA:

11 FEPUARI 2018

MATAUPU:

**APERAMO LE TAMĀ O LE ‘AU
FAATUATUA**

A oo loa ina fesiligia poo ai le tama o le au faatuatua: e tasi lava le tali: – O Aperamo le tamā o le Au Faatuatua. Ao le fesili - Aisea? O le faamoemoe lena o le mataupu o lenei Aso Sa. Ia tatou fetufaai poo gafea o le olaga o Aperamo na iloga ai lona faalupega lea: o ia o le tamā o le Au Faatuatua.

FAATINOGA O LE MATAUPU:

Ia faatalanoa le Autalavou i le fesili lenei:

1. O le ā le mafua’aga ua lauiloa ai Aperamo i le fa’alupega lenei, “O le tamā o le ‘Au Fa’atuatua?”

FESOASOANI MO LE FAIAOGA:

a. O loo faamauina i le tele o suesuega e uiga i lea mataupu e faapea, o le faalupega lenei o Aperamo, na afua mai i lona finauina o loto o ona tagata, ina ia toe foi i le Atua.

Faamatalaga:

1. E lona 20 Aperamo i le faasologa o augā tamā o le Tusi Paia, amata mai ia Atamu. Sa talitonu Atamu i le Atua, fa’apea fo’i Setu, lē sa soso’o ma Atamu. Na mavae Setu, ae tulai Enosa.

2. O le vaitau o Enosa na amata ai ona sui le faiga o tapuaiga. E moni na tumau le talitonu o tagata i le Atua, peitai, ua latou fau fa’atusa o mea sa faia e le Atua e iloa ai lona mamalu. E le’i pine ae amata ona fa’atutū malumalu ma fata fai-taulaga mo le

masina ma fetu, ma lo latou talitonuga, e fiafia le Atua i mea ua latou faia.

3. Mulimuli ane ua tula'i mai perofeta taufa'asesē. Ua latou tautala atu e fa'apea, "ua latou maua fa'aaliga mai le masina ma fetu; ma ua latou fa'aailoa mai fo'i itua'iga tupua e tatau ona fai ma fa'aailoga mo latou".

4. Na avea ia talaiga ma ala na i'u ina galo nimo ai ma le suafa o le Atua silisili mai mafaufau ma laugutu o tagata o le lalolagi, ma ua le iloa lava o Ia. Na i ai lava tagata na talitonu i le Atua i lea vaitau e pei o Enoka, Metusela ma Noa ma Semu, a ua liliu le lalolagi se ia o'o ina fanau mai Apera'amo.

5. A o la'ititi Apera'amo, sa mulimuli atu fo'i ma ia ile tapua'iga a lona aiga; peita'i, sa mafaufau ma tu'u fesili pea: 'Pe fa'apefea ona ta'amilo le Masina ma fetu o lo'o latou ifo iai, ae leai se malosi (force) o faia lenei galuega?' Ma le tele lava o isi mau fesili e pei o le fau o atua i o latou lima ona toe ifo lea iai. O ituaiga fesili nei sa o'o ina mautū ai le lagona o Aperaamo, 'E iai se malosi o lo'o faia lenei galuega tele, o le malosi lea e tatau ona iloa e tagata, ma o le Atua moni lea'.

6. O le fasefulu (40) o ona tausaga sa mautū ai lona lagona e tasi lava le Atua, o lē e pule aoao i mea uma o i le va nimonimo, ma e tatau ona ifo ia te ia, na o ia lava.

7. Sa ia finau lana mata'upu i tagata o Uro i Kaletaia, ma sa ia fa'aleaga a latou tupua. Sa ia tala'i lenei fe'au i tagata ma fealua'i solo i aai ma taulaga ese'ese. E to'atele lava ē sa naunau e fia fa'alogo ma tu'u fesili ia Apera'amo i le uiga o ana upu. Sa mulimuli atu ia te ia le ta'i afe o tagata, ma le sefulu o afe, ma sa fa'ato'ateleina lava tagata sa fia fa'alogo i lana mata'upu ma latou mulimuli atu ai ia te ia. Sa ia tusia fo'i lana mataupu i papa ma'a ma fa'apea ai lava ona lautele lana tala'iga. O le mafaufauga lea sa ia Apera'amo, o loo vavala

mai lava i tulafono muamua e lua. Aua ne'i fai mo 'oe ni atua 'ese i ou luma....Aua nei fai mo 'oe se tupua ua ta, po o se fa'atusa lava o se mea i le lagi i luga.

Fa'atalanoaga:

1. O le liliu o le lalolagi mai le Atua silisili e pei ona sa amata mai ile taimi o Enosa, o se mea sa faifai malie ona tula'i mai, e le'i tupu fa'afuase'i. Pe mata o iai ni suiga fa'apea o lo'o aliali mai i la tatou Ekalesia e ono liua ai tupulaga amuli mai le Suafa o le Atua silisili?

2. O le a se 'ese'esega o Aperamo ma Atamu ma Setu?

3. "Aperamo le tamā ma lana fanau e to'atele naunau...o 'au le isi o 'oe le isi..." E iai se mea e mafai ona tatou faia ina ia fa'aaau ai le finauga lenei sa amata e lo tatou tamā o Aperamo?

Manuia le Aso Sa!!!

.....

ASO SA: 18 FEPUARI 2018

MATAUPU: O LE VALAAUINA O IEREMIA.

Ieremia 1: 4-10

O le valaauiina o Ieremia e avea ma perofeta, o se galuega na tofia i ai e le Atua ao lei fanau mai o ia. O le gasologa foi o le galuega a Ieremia, e le'i tuulafoaina lava e le Atua, aua o Ia lava na ia taitai ma faamalosi ao faagasolo le galuega faa-perofeta. O le fa'amoemoe o lenei mataupu, ia tatou toe auilili i lenei tala, ma a'oa'o mai i le tele o a'oa'oga taua o loo i ai, e fesootai ma soo se valaauiina o loo fa'aaogaina i ai le tatou Autalavou.

FAATINOGA O LE MATAUPU:

1. Faitau le tala ma faasoa manatu i le uiga o ia fuaiupu, ao a foi ni a’oa’oga o aumai ai.

FESOASOANI MO LE FAIAOGA:

f4-5: E tolu vaaiga taua ia o loo faamatala ai le filifiliga a le Atua na faia mo Ieremia. *1. Na au iloa oe...2. Na au faapaiaina oe.....3. Na au tofia oe....*O le filifiliga amiotonu a le Atua, e silafia ai le tagata e tatau mo lea galuega ma lea galuega.

f. 6: O lagona ia o le faatauvaavaa na oo ia Ieremia ina ua faailoa atu le finagalo o le Atua mo ia. Na ia fa’aaoga ai le upu – tama itiiti, e faamatala ai lona le iloa o se mea ma lona moomia o se fesoasoani. E faamoemoe le manuia o le tamaitititi i le tausiga a ona matua. O le lagona foi lea o Ieremia, o ia o se auauna faatauvaavaa, e moomia se taitaiga ma se faasinoga mai le Atua ina ia manuia lona valaauina.

f.8: Ua faamanino e le Atua ia Ieremia le atoaga o lona valaauina. E le o se valaauina e faia na o ia, e pei ona atugalua ai lona mafaufau. Ao le valaauina o loo i ai faatasi ma le taitaiga mana a le Atua. O le fesili, aisea ua le fetalai ai le Atua, o le a ia fafaga ma faainu, pe avatu foi le poto ia Ieremia? E tele lava tali e mafai ona tatou mafaufau i ai. Ao lea ua faamanino atili ii, le silafaga mamao a le Atua, aua ua ia silafia le tele ma le anonoai o faafitauli e fetaii ma le galuega tala’i mo Ia ma lona malo e faavavau. O le fa’aaogaina la o le upu – lavea’i, e faamatala ai le tausiga ma le puipuiga a le Atua, ua lava lea e manino ai la tatou vaai, o soo se valaauina ma soo se galuega e i ai lava ona faafitauli. Ao faafitauli e mafai ona foia pe afai tatou te fa’amoemoe i le laveaiga a le Atua.

f.10: E valaauina Ieremia e fai ma perofeta, ua sasao fa’aafi le ola faapaupau o tagata. Ua toatele i latou ua fulitua i le Atua ae

tapuai i atua ese. O le uiga lea o le fetalaiga a le Atua ia Ieremia, o lana galuega o le *liaiina, lepetia, faaumatia ma soloia*. E fa upu ia e faamatala ai galuega faatino a Ieremia, ae tasi lava le auga ma le fa'amoemoe, ia aua lava nei toe vaaia ia ituaiga amioga faapaupau o faia e tagata Isaraelu. O le gagana lea faafitafita i taimi o taua, o le liaiina, lepetia, faaumatia ma soloia ona fili. O le galuega la a Ieremia, o le tafieseaa lea o amioga o loo faasagatau i le Atua ma lona finagalo. Auā o faiga faapaupau ma amioga mataga, o le fili lea na te faaleaga le finagalo o le Atua mo ona tagata.

O a'oa'oga mo le tupulaga talavou:

1. O tofiga ma le valaauina o le tagata, o mea ia mai le Atua.
2. E amiotonu filifiliga a le Atua.
3. E finagalo le Atua, ia faapaiaina tagata uma mo lana feau ma galuega.
4. Ia lagona lo tatou faatauvaa i tofiga a le Atua, ma ia faamoemoe pea i lana faasinoga e manuia ai o tatou faiva
5. E le tuulafoa'iina e le Atua ona tagata i soo se taimi ma soo se aso.
6. O le tatou galuega faatupulaga talavou, o le lia'iina, lepetia, faaumatia ma soloia ni faiga amioletonu o vaaia ma faatinoina i lo tatou siosiomaga.
7. Ia avea i tatou o ni tupulaga talavou e taulamua i le totoina ma le faasusuina o le amiotonu a le Atua. Manuia tele lenei Aso Sa.

.....

ASO SA:

25 FEPUARI 2018

MATAUPU: O LE AIGA O APERAAMO

Ua maea ona tatou talanoa i le mafuaaga ua faalupe ai Aperaamo o le tamā o le au faatuatua. Ao le Aso Sa lenei o le a tatou talanoa ai i lona aiga ma saili poo a ni aoaoga e tatau mo i tatou le tupulaga talavou.

FESOASOANI:

1. O loo taua i le tusi o Kenese nisi o faamatalaga e uiga i le aiga o Aperaamo: o lona tamā, o ona uso, o lana fanau ma nisi o faamaumauga o loo i ai.

Talatu’u Iutaia:

a. I tala tu’u a Iutaia (*Jewish traditions*) o loo ta’ua mai ai, o Tara le tamā o Aperaamo, sa fauina tupua. O le atina’e lea a lo latou aiga sa tupu tele ai lō latou oloa. O le vaitaimi lea po o le lona lua o senituri, sa avea ai Uro ma laumua o Mesopotamia aua sa tele lava lo latou tamaoa’iga.

e. Ina ua mausalī le manatu o Apera’amo e tasi lava le Atua (e pei ona taua muamua), ona ia fa’aleagaina lea o tupua uma a lona tamā, ae fa’atotoe ai na o le tasi, e fai ma fa’ailoga o lona talitonuga, e tasi lava le Atua.

Tusitusiga Lotu Isalama:

a. O tusitusiga a le lotu Isalama o lo’o tusia ai le tala i le fesāga’iga a Apera’amo ma lona tamā e uiga lava i tupua. O lo’o ta’ua ai ma le tala i le fa’asalaga sa folafola e le tupu o Papelonía o Nimarota, ina ia susunu Apera’amo i le ogaumu ‘a’asa ona o lona faaleagaina o tupua mamate. (*ai lava e pei o le ogaumu ‘a’asa lea sa lafo iai Sataraka, Mesako ma Apeteniko*). E le’i taunu’u lenei sala ona sa lavea’i le Atua ia te ia. O lo’o tusia i le Kenese, sa alu Apera’amo ma ave lona tamā ma lona aiga ina ua latou o ‘ese mai Uro, ona latou aumau ai lea i Karana (*o Isara’elu i aso nei*). O Karana sa vala’auina ai

loa ina ia tu'ua mea uma sa masani ai, ae alu i le nu'u o le a ia fa'asino mai ia te ia.

A tu'u fa'atasi la nei molimau (*Kenese, Tala tu'u a Iutaia ma tusitusiga Isalama*), ona lautele ai lea o la tatou va'ai i le Aperamo lea sa tu'u lona nu'u ae alu i le mea ua vala'auina iai o ia e le Atua. E vala'auina Aperamo, ua 75 ona tausaga.

O Aperamo ma le nofo alo:

1. O le ulumatua o Isamaeli; sa ave'eseina o ia ma lona tinā ona o le augani a Sara. E fanau Isamaeli ua 86 tausaga o Aperamo, a o le 99 o ona tausaga fa'ato'a peritomeina ai (*Ken 17*). O lona atali'i o Isa'ako na fanau ina ua 100 ona tausaga. Ina ua oti Sara, ona toe fa'aipoipo ai lea o Aperamo ia Kitura, ona fanau ai lea o Semerana, Iokasana, Metana, Mitiana, Isepaka ma Sua. O loo tusia i le Kenese sa foa'i e Aperamo mea alofa ia i latou (*fanau a Kitura*) ma sa ia auina i latou i atunu'u i sasa'e, "...ia te'a ese'ese ai ma lona atali'i o Isa'ako" (*Kenese 25: 6*).

Fesili e faaiu ai le mataupu:

1. O le a so tatou taofi: Pe lelei le mea sa fai e Aperamo i le atina'e a lo latou aiga i Uro i Kaletaia?
2. E mafai ona e faia faapea se mea ua fiafia iai lou tamā?
3. O le a se a'oa'oga mo tatou mai lenei mea sa tupu?
4. O Isa'ako le tama o le feagaiga.
 - a. Sa fa'apefea ona tausia e Aperamo lenei vaega o le feagaiga ma le Atua?
5. So'o se aiga Samoa lava, o le ulumatua (tama) e ta'ua o le "alii o aiga". O le a sau fa'amasinoga i le va o Isamaeli ma Isa'ako? O ai le alii o aiga?
6. E fa'apefea ona fetalai mai le Atua ia i tatou e ala i lenei vaega o le tala?

a. O a ni auala fa'a aso nei tatou te faia ina ia iloa ai e sili lo tatou mata'u i le Atua nai lo o tatou aiga ma matua?

e. O lafoia le ata o le tulafono e 5: "Ia e ava i lou tamā ma lou tinā." I le va o Apera'amo ma lona aiga e tusa o le tala tu'u a Iutaia?

.....
ASO SA: 4 MATI 2018

MATAUPU: "O LE TAUA O LE TAUSI LELEI O MATUA TAUSI AIGA"

O loo tuufesilisili pea le toatele pe alagatatau le ave o matua tausi i Mapu i Fagalele ae le o le tausi i aiga.

O le faamoemoe na faatuina ai Mapu i Fagalele, o se mafuaaga tatau. E le afaina foi i manatu le i ai o mafuaaga tatau. Ua manatu nisi e ave matua i Mapu i Fagalele ona o galuega ma le leai o ni tagata e tausia i aiga.

O nisi nei o fesili e fai i ai le fetufaa'iga a le Autalavou ina ia manino le taua o le tausi faamaoni i matua tausi i aiga.

- a) O le ā se taofi o le Autalavou: e talafeagai le ave o matua e tausi i Mapu I Fagalele pe leai? Afai e ioe (pe leai foi) ia faamanino mafua'aga o lau tali.
 - i. O nisi ua manatu e ave matua i Mapu i Fagalele ae faamuamua galuega, o le a sou taofi, e tatau lea mafuaaga pe leai?
- e) O le a se taofi o le Autalavou i le poloaiga a le Atua ua aumai: Ia e ava i lou tamā ma lou tinā, aua foi e te inoino i lou tinā pe a loomatua o ia. Faamata o lo tatou ava lea, o le tausi e isi tagata?

- i) O le upu moni, e manuia le tagata e tausī matua. O le a la se manatu o i tatou le Autalavou i lea mea? O ai la e manuia i lea mea? O Mapu i Fagalele poo le fanau?

FESOASOANI MO LE FAIAOGA:

1. E leai se faamoemoe o le mataupu e ta'uleagaina le auaunaga o loo faia i Mapu i Fagalele.
2. Ao le mataupu o se tatou fetufaa'iga poo a ni itu e tatau ai ona ave matua tausī i Mapu i Fagalele ao a foi ni itu e le tatau ai.
3. O loo tulimatai e le tatou mataupu, le faamamafa ma le faataua o le tausī o matua i aiga.
4. Tapena pea lau susuga i le fai mataupu e faamaopoopo tali a le Autalavou.
5. O le faamoemoe ia a'oa'oina ma iloa e le Autalavou, e taua le tausī i matua tausī.

Manuia le Mataupu...

.....

ASO SA: 11 MATI 2018

**MATAUPU: O LE ATUA MA LE MATIVA O LE
TAGATA - Esoto 16: 11-18**

O loo finau pea nisi o tagata, o loo i ai le – MATIVA – i totonu o Samoa. Ao le fesili – Aisea? O le a le mafuaaga o le Mativa? O nisi ia o fesili mo le faalateleina o le mataupu:

1. Ia vaelua le Autalavou i vaega lua: o le vaega e ioe o loo i ai le mativa ma le vaega e tetee, e leai se mativa.

2. Ia aumai ni mafuaaga e lagolago ai manatu o vaega e lua.
3. A maea le finauga, ona fetufa'ai faatasi lea o le Autalavou i le tusi faitau ua saunia: Esoto 16: 11-18.

FESOASOANI MO FAIAOGA:

f.13. salu - o le ituaiga o manulele e maua i ia vaega o le vao o Sina. O le galuega alofa a le Atua, na ia faatoto ai le manulele i luga o Isaraelu. Pau la latou galuega, o le pu'e ma fa'aaoga. Ua faafaigofie e le Atua la latou galuega saili.

f.14. sau to'a - ua faaigoa o le manai (o lona uiga - O le a lenei). Ua talia lautele lava, o le manai o le falaoa mai le lagi mo le fafagaina o le nuu o le Atua.

f.16. omera - o le fua, e fuatia ai meaai mamago e pei o falaoa, saito, ma le manai. O lona faaliliuina lata mai o loo i ai i suesuega o le Tusi Paia, o le omera e tutusa ma le tolu pauna (3lb). Afai e omera, o lona uiga, e tolu pauna manai a le tagata e ave i lona fale.

- i. O le tala sa faitauina mai le Tusi o Esoto, o se vaega o le tala umi o le malaga a Isaraelu i le vao mo le 40 tausaga. O le mea ua tupu ua muimui le nuu i le Atua, ona ua utiuti le faasoia i meaai e tausi ai i latou. Ua galo ia Isaraelu, o le faitio ia Mose ma Arona o le faitio lava lea i le Atua. O le mafuaaga lea o le fetalai ane o le Atua i a Mose e pei ona faitauina mai le fuaiupu e 11-12 ma ta'u i ai le faatonuga mo Isaraelu.
- ii. O le muimui o le nuu i le Atua ona o le fiaaai ma le fiainu, ua lē ese lea ma le tuuaiga ua tatou faia, o i tatou ua matitiva. E faavae ia manatu i le talitonuga, o lea lava e tele faamanuiaga a le Atua mo ona tagata.

- iii. O le muimui o Isaraelu e mafua mai i le manao lē faamalieina. O lea faatoa lua (2) masina talu ona o ese le nuu mai Aikupito. O loo i ai lava meaa, o meaa na saunia aua le malaga umi. O loo i ai foi lafu manu na faatonuina e ave i le malaga. Ao le faitio ma le muimui e mafua mai i le manao lē faamalieina i meaa ua maua.
- iv. Ua fesoasoani le tusi faitau e faamanino i a i tatou mea nei:
 - i. E le tuulafoaiina e le Atua le mana’o o ona tagata.
 - ii. E tele auala o faamanuiaga a le Atua mo le tagata.
 - iii. O le finagalo o le Atua ia tatou faasoa ma fetufa’ai i ona manuia ua aumai. “ia omera a le tagata”

O ai la e mafua ai le mativa? - *E mafua lava i le tagata lona mativa. O lona faatamala ma lona paie e galue ma saili faamanuiaga mo ia ma lona aiga.*

Faamanatu: Aua le tuuaia le Atua ona o le mativa o le tagata.

.....

ASO SA: 18 MATI 2018

MATAUPU: UA GALALA LE TUIMANUA, UA FIAINU FOI TAVITA

E i ai tala o le Tusi Paia, o loo iloa ai le leaga o le naunau e faamalie le laualo (sei tulou). O Esau na aveesea lona tofi ulumatua ona o le fiaai. O Atamu ma Eva na faasalaina, ona o le ai e tasi i le fua o le laau na faasaina e le Atua. O le mataupu o le Aso Sa lenei, tatou te faatusatusaina ai le tala i le Tuimanua na fia inu i se vai mai le vai o Alao ma Tavita na

fiainu i se vai mai le vaipuna i Peteleema. O le faamoemoe ia saili poo a ni itu e lelei poo ni itu foi e lape ai le manao o i laua ia.

FAATINOGA O LE MATAUPU:

1. Ia vaevae le Autalavou i vaega e lua. Faitau manino i tala ua filifilia ma tali i fesili o loo aumai mo le faalauteleina o le mataupu. (Fautuaina le tapena o ni kopi o le tala i le Tuimanua. Tofu le vaega ma le kopi)
2. Tala i le Tuimanua ma le vai o Alao ma le tala ia Tavita (2 Samuelu 23: 15 – 17).

TUIMANUA MA LE VAI O ALAO:

Na aave atu i Samoa tala i le vai o le tagata e igoa ia Alao. Ua avea nei tala ua fai ma avega mamafa i le loto o le Tuimanua, o loo nonofo nei le Tuimanua ma si ona afafine pele e toatasi. Le tamaitai o Taufalematagi, le teine a savali i le ala e muliauloa ai tama e matamata i lona lalelei. A o faagasolo pea aso o le olaga, ua vaايا e le teine foliga faanoanoa o lona tamā, aua foi ua faananau tele ona loto i le vai o le alii o Alao fai mai a inu ai le tagata e toe faafouina lona malosi. E le gata i lea o le a avea foi ma tagata ma itu lua.

Ua oo i le isi afiafi ona fai atu loa lea o le teine i lona tamā; Lou tamā e, aisea ea ua e faanoanoa ai? Ioe, lou afafine pele, ua ou fia inu lava i sina ipu vai o le vai o Alao o loo aave mai nei tala i Samoa. Vai o Alao? Oi o ai le toa e alu iai o loo leoleo e le anoano e aitu ma ilamutu a le tamaloa. Lou afafine, o lou manatu tasi lava le tagata e mafai ona ou maua ai le tagata e mafai ona maua ai sina vai. Ua na o oe lou afafine pele, aua e vaai Alao ia te oe, o le a manao loa ia te oe ona maua ai loa lea o sa ta vai. Ae faapefea la ona ou iai i lena nofoaga?

Taufalematagi lou afafine pele, tau lava na e saunia. Ae faitalia lava a’u ilamutu ma momoli oe i le nofoaga o iai le vai

ae sauni loa le malaga ia manuia. Ua fai le faatonuga a le toeaina i ana ilamutu, ia vave ona momoli le teine i le nofoaga o Alao ma lona vai. Na faateia le teine i le ala ane i le tasi aoauli, ma le vaai atu e ese le nofoaga lea e moe ai, o ona luma o loo i ai se puna e manino pei se tioata. Ua manatua e le teine le manao o si ona tama ina ua vaai atu i le vai, ona faapea lea o nai ona mafaufauga, po o fea la le tagata e ona le vai? A o to manatu le teine ae faateia i le saofai mai o se tagata tino malosio toe aulelei, ona ia fai atu lea. Talofa alii Alao, ua faapea mai foi Alao si ou alofa Taufalematagi, alii Alao ua ou sau mamao lava ona o le manao o si ou tamā, e fia inu i sina mataua o lou vai. Poo le vai ea lea? Ioe, o le vai lenei lua te fesagai, o le tulafono o lenei vai, o se tamaitai na te uluai tu pe solia lenei nofoaga o ia lena e fai ma au pele i lou olaga atoa. Ua lelei Alao o lou loto foi lea, a ia e agalelei i sina vai o loo faatali mai pea si ou tamā.

Ua manatu o le a fai sina faamatalaga i sina vaega o lenei tala e pei ona faailoa ina atu. Ua mafuta nei le teine ma Alao, e le itiiti ni tausaga na mafuta ai lenei ulugalii. O se aiga e tele ni mafatiaga na feagai ma lo la aiga, o se taimi fa'aauau le tala ae lelei ona saili fesoasoani mai i le Vaega 1 o la tatou tala.

2 Samuelu 23: 15-17:

O le vaieli i Peteleema, e leoleoina e fitafita. O lona uiga, e fougou gata le asuina o le vai mo soo se tagata. Peitai, o le taunuu mai o fitafita ma le vai ia Tavita, na ia lagona ai le alofa loloto mo e ua feoti. Aemaise ai o le tautua a nei auuana, na ofoina le ola mo le faamalieina o le galala o le tupu.

FESILI MO LE TALANOAGA:

1. Se mea tatau le faaiuga a le toaina, e ave lona afafine mo Alao ae aumai ai se vai? (Silasila i le va nonofo ai o matua ma fanau, se mea sa'o lea mea pe leai?)
2. Ae faafefea pe ana afaina ai le ola o lona afafine?
3. I le tala ia Tavita: se mea tatau lona manao i le vai e pei ona faamatalaina?
4. E faapefea i latou ua fasiotia ona o le fiainu o Tavita?
5. Aisea na sasaa ai e Tavita le vai ae le inuina?
6. O le a ni a'oa'oga mo i tatou le tupulaga talavou ua maua mai nei tala?
7. Ao le fesili, pe ana feoti nei fitafita, o ai e tuuaia i lenei mea? O Tavita poo fitafita lava latou?
8. Ae aisea ua le naunau ai Tavita i se isi vai e faigofie ona aumai, e le lamatia ai se ola?

.....

ASO SA: 25 MATI 2018

MATAUPU: FINAUGA (debate) -“Pe tatou te sao i le malo o le lagi pe leai?” - Mataio 7: 21, 22, & 23.

FAATINOGA O LE MATAUPU:

1. Vaevae le Autalavou i vaega e lua: o le vaega e IOE: (*Ioe, tatou te sao ile lagi e tusa ma le tusi faitau*) ma le vaega e LEAI; (*Leai, tatou te lē sao ile lagi e tusa ma le tusi faitau*).
2. E pule le ta'ita'i i le vaega e IOE ma le vaega e LEAI. Afai ua tofia se tasi i se vaega (*fa'ata'ita'iga a lavea Simi i le vaega e Ioe, tusa lava pe lē fia Ioe Simi i le mata'upu*), e le mafai ona suia.

3. Tofu le vaega ma le ta'ita'i, ia iai fo'i se failautusi na te fa'amauina manatu o le vaega.
4. Ia filifilia se faamasino se to'atasi pe to'alua fo'i. Aua ne'i faaitū'au le faamasino. O le faamoemoe ia atina'e le tomai e finau ai.
5. E maua le togi: Ua le mau tali le isi vaega. A fai faalua (*repeat*) se manatu, maua le togi o le isi 'au. Ia togia le vaega e tele manatu e faavae i le Tusi Pa'ia
6. Tuu atu i le taitai le taimi mo le debate.

FESOASOANI:

O le a tonu lava le finagalo o le Atua?

Mataio 7: 21 E lē sao atu i le malo le lagi i latou uma o e fai mai ia te a'u, Le Ali'i e, le Ali'i e; na o le na te faia le finagalo o lo'u Tamā o i le lagi.

O le vaega o le fetalaiga i le Mataio 7: 21 “*E lē sao.....i latou uma o e fai mai...*” o lona uiga moni, “*E le o i latou uma o e fai mai...*”

O lona uiga, e sao lava isi, a o isi e le sao.

Aisea e lē sao ai tagata o e vala'au “le Alii e, le Alii e?”

Afai e vala'au i le suafa o le Ali'i, ma fai le finagalo o le Atua, ona sao lea. E usita'i i poloa'iga uma a le Atua, ma soifua i le amio atua ma le ola faapa'iaina. O lona uiga, ia atoatoa le lelei. Iakopo 2: 10. “*..a agasala ise mea e tasi, ua nofo sala o ia i mea uma*”. Ia 100% le ola amio atua, ona mautinoa lea ua sao. E leai se isi na te mautinoa po ua lava lona usita'i; po ua lelei lana amio atua, po ua atoatoa lona soifua faapa'iaina. O lona uiga, e leai se isi e sao i le malo o le lagi.

E lē feagai lenei manatu ma aoaoga a le Tusi PAIA. O loo manino i le Tusi Pa'ia, o le 'au so'o, o ē sa va'ai ma feoa'i ma Iesu; sa latou iloa ma le mautinoa ua faaolaina i latou, ma sa

naunau fo'i ina ia iloa e tagata uma o e faitau i a latou tusitusiga (Evagelia) le upu moni e pei ona latou maua, ma ia faaolaina ai fo'i i latou (Luka 10: 20; Ioane 13: 10; Roma 8: 31 39; 2 Peteru 1:1; ma isi).

O le finagalo o le Atua e tusa ma fetalaiga a Iesu, e faapea: “O le ua talitonu i le Alo, ua ia te ia le ola fa'avavau, a o ē lē talitonu i le Alo, na te lē iloa le ola, a o le to'asā o le Atua e i ona luga” (Ioane 3:36).

O le finagalo o le Atua, ia talitonu ia Iesu Keriso le Alo, e maua ai le ola e faavavau. O tagata fa'apea ua faamamaina i luma o le Atua aua ua ave'ese e Iesu agasala, ae suia ile ta'uamiotonuina (2 Korinito 5;21; Kolose 2:13, 14; Eperu 10: 1 ff).

Ua uma ona faailoa mai e le Atua lona finagalo mo tatou i le Ioane 3: 16. Ua tatou faitau fo'i i le tali a Iesu i le taule'ale'a, *'E te alofa atu i le Ali'i lou Atua ma lou loto atoa, ma lou agaga atoa, ma lou manatu atoa,*” ma lona lua, *“E te alofa atu fo'i i le lua te tua'oi ia pei o oe lava ia te oe”* (Mataio 22: 37 ff.).

O lona finagalo lea mo le tagata, ia pei o loto e lua ua fusia i le alofa o le tasi i le isi. Ia maua e le tagata le mafutaga lea (relationship) ma Keriso.

O ai e sao ile malo o Iesu? O i latou ia o e fai mai, ”Le Ali'i e, le Ali'i e” ma latou faia le finagalo o le Atua, ma naunau i le vi'iga o le Atua.

O ai e lē sao ile malo o Iesu? O e vala'au “Le Ali'i e, le Ali'i e, ae latou te le faia le finagalo o le Atua; latou te sa'ili ai vi'iga mo latou.

Ia manuia le Finauga!!!

.....

ASO SA:

1 APERILA 2018

MATAUPU:

O AUGA – TAMĀ O LE TUSI PAIA.

Ua masani le faitau ma le faaofoga i lea upu – Auga tamā o le Tusi Paia. Peitai, e i ai le talitonuga e taua lo tatou toe sailiili i ia upu ma lona fa’aaogaina i le tatou talitonuga faa Kerisiano.

Fesili mo le Autalavou:

1. O le a se silafia i lea upu – Auga tamā ae poo ai foi e faasino i ai lea faalupega.
2. O ai e silafia ni nuu na tupuga mai le aiga o Tara poo Aperaaamo.

FESOASOANI:

Fesili 1. O le upu Auga tamā o se fa’aliliuga mai le upu palagi o le ‘forefathers’; a o le gagana a le Tusi Pa’ia sa fa’aaogaina le upu ‘Patriarch’, lea e fau mai ai le upu a le Ekalesia Katoliko o le ‘Pateliaka’. O le upu la lea o le Patriarch sa toe fa’aliliuina (*revised*) i le gagana Peretania ma maua mai ai loa le Forefather, lea ua fa’a-Samoa o augā-tamā.

O auga tamā ua fa’aaogaina nei e fa’atatau ia Aperā’amo, Isa’ako ma Iakopo; o ulua’i tamā ia na tupuga mai ai sā Iutā (*Jews*), o le talitonuga lea o le lotu Iutaia. O latou o suli mai lo latou tamā o Iakopo, le atali’i o le atali’i o Aperā’amo; O Iakopo, lea sa suia e le Atua lona igoa ia Isara’elu.

e. E talitonu nisi o le au suesue o le Tusi Paia, o le upu - auga tamā e fa’atatau i le to’a luasefulu (20) o tamā (*male ancestors*) mai ia Atamu se ia oo mai ia Aperā’amo. O le to’a sefulu o ia tamā sa soifua a o le’i o’o i le lolo: Atamu – Setu – Enosa – Kainano – Ma’alaelu – Iareto – Enoka – Metusela – Lameko – Noa (Kenese 5). O le upu fa’a palagi e ta’ua ai latou nei o le

Antediluvian patriarchs. (Ua lē maua se fa'a-Samoa o lea upu). Ina ua mavae le lolo, ona fa'asolo mai ai lea o le isi to'a sefulu (10) e oo mai ia Aperamo: Semu – Afasata – Selaa – Eperu – Peleko – Reu – Seruka – Nakori – Tara - Aperamo (Kenese 11).

O le vai taimi sa soifua mai ai latou sa fa'aigoa o le vaitaimi o Pateliaka (*Patriarchal period*).

Fesili 2. O nisi nei o nuu e tupuga mai Auga – tama: Aperamo, Isaako, Iakopo.

- i. Tara sa fanaua Aperamo, Nakori ma Arona.
- ii. Isamaeli le atalii o Aperamo ia Akara le *auauna a Sara* e tutupu mai ai Sā Isamaelī (*Ishmaelite*).
- iii. Mitiana le atalii o Aperamo ia Kitura (*ina ua oti Sara*)– sa tutupu mai ai tagata Mitiana (Ken 25)
- iv. O Nakori le uso o Aperamo na tupu mai ai Petueli lē sa fanaua Lapana (tama o Lea ma Rasela) ma Repeka
- v. O Nakori fo'i le uso o Aperamo o le tamā lea o Lota.
- vi. Moapi le atalii o Lota i lona afafine matua ona maua ai lea o Moapi – sa tutupu mai ai tagata Moapi
- vii. Pename le atalii o Lota i lona afafine la'ititi sa tutupu mai ai tagata Amoni (Ammonites). (Ken 19: 37f)
- viii. O Aperamo ma Sara o mātua ia o Isa'ako
- ix. O Isa'ako ma Repeka mātua o Esau ma Iakopo – o Esau na tupuga mai ai tagata Etoma
- x. Na usu Esau ia Ata ona maua ai lea o Elifasa – o Elifasa lea na fanaua Amaleka, le tupu'aga o sa-Amaleka.

O Itua'iga e 12 o Isara'elu, e aofia ai atali'i e to'a 10 o Iakopo (*e le aofia ai Levi ma Iosefa*) ma atali'i e to'a 2 o Iosefa:

O le to'a 12 lea o lo'o taofi pea tagata Iutaia (*Jews*), e tutupu mai ai i latou, ma le igoa o lo latou atunu'u o Isara'elu, o le igoa sa fai e le Atua ina ua ia suia iai le igoa o Iakopo.

Fanau:

Iakopo ma Lea: Reupena, Simeona, Levi, Iuta, Isakara, Sepulona

Iakopo ma Rasela: Iosefa ma Peniamina

Iakopo ma Pila (*auauna a Rasela*): Tanu ma Nafatali

Iakopo ma Selepa (*auauna a Lea*): Kato ma Asera

Iosefa ma Asenati: Manase ma Efaraima

.

O se va'aiga 'oto'oto lea tatou te iloa ai le so'otaga o tagata o lo'o ta'ua i le Tusi Pa'ia ma tagata Isara'elu. E tasi le pogai sa latou tutupu mai ai (*O fanau ma feoi o le toea'ina o Tara*). O isi itu-aiga uma fo'i o lo'o ta'ua i le Tusi Pa'ia, sa tutupu uma mai lava i augā-tamā. A ua fai ma fa'aa'oa'o le fanau a Tara ina ia maua ai so tatou malamalamaga i le tupu'aga o tagata uma sa nonofo ma 'ainā ai le lalolagi.

3. Fesili e faalatele ai le mataupu:

1. Afai tatou te faia se fua fa'a aiā tatau ma le aiā fa'a sulii, se'i fa'aali mai sou taofi?

a. E sa'o le taofiga o tagata Iutaia (*Jews*), 'Na o latou e tatau ona nonofo i le nu'u Pa'ia? Aumai ni mafuaaga e lagolago ai lou manatu- ioe pe leai.

2. Ia tatou mafaufau fa'a tagata Kerisiano, o e ua talitonu ma mulimuli ia Iesu ma ana a'oa'oga, o le a sou lagona?

a. Aisea na le fealofani ai fanau nei a augā-tama? Ta'atia ia le to'atele o augā-tama, ae tatou va'ai i fanau a Apera'amo. f.t. Tatou va'ai i le feagai ai o tagata Iutaia (*Jews*) ma tagata

Mitiana; o itua'iga sa tutupu mai i fanau a Aperamo (O Mitiana le isi atali'i o Aperamo ia Kitura).

e. E iai se vala o le gafa o loo ta'ua i luga e mafai ona fai ma o tatou pi'itaga i le aiga o le susuga ia Aperamo, ma e faapefea ona tatou maua se vaega o manuia sa folafolaina ia Aperamo?

.....

ASO SA: 8 APERILA 2018

MATAUPU: LUFILUFIINA O MEA TAUMAFI

Tasi leni vaega taua o lo tatou soifuaga faatautua i totonu o tatou aiga, nuu, po o aulotu foi. O se aganuu na avatu muamua foi i nisi tausaga ua tuanai, ma o lo o maitauina pea le gasolo ane o tupulaga i le Autalavou. E manatu ai lava le Polokalame, e ao pea ona toe faamanatu leni aganuu taua i tupulaga talavou.

(Fesiligia pea le Autalavou i so latou finagalo i le upu fa'aaloalo o taumafa ma le faasoaina poo manatua)

Ao le fesoasoani lea ua tapenaina mo lau susuga i le fai mataupu:

1. Moa (taailepaepae, faailoao, moe-piilima): E faataliaga le moa, ona muamua lea ona vavae ese le vae tauagavale, ona faatoa vavae'ese lea o le vae taumatau faatasi ma le nofoi (no'o). Faatu agai i luga, ona vavae'ese ai lea o tau'au e lua.

Faasoaga:

vae o lo o pipii ai le noo - faifeau/alii taua
Vae agavale - faletua o le faifeau/isi alii

Tau'au (2)	-	tulafale
Ua o le moa ma le vaavaa	-	tamaiti

2. Puaa (manufata,lafu): E muamua lava ona ave'ese alaga e fa, ona faafao lea o le puaa. O se ata faigofie e fesoasoani ai i lau lufilufiina. Vaai le ogatotonugalemu po o le afa tonu o le umi o le puaa, ona vavae ai lea. O le vaega agai i le nofoi, e toe vavae foi i lona ogatotonu onamaua lea o le tuala ma le nofoi. O le vaega agai i le ulu o le puaa, e vavae faalua mai i le totonugalemu o le vaega lena e vavae ai, ona toe vavae lea, e pau tonu i lalo ifo o taliga o le puaa. Ona maua ai lea o le o'o, ivi muliulu, ma le atigi ulu o le puaa. E faigofie lava pe a oo ina masani ai. Ia fetuunai lelei lau fua, nei umi le puaa, ae pu'upu'u le tuala.

Faasoaga:

a) tuala	-	faiifeau/alii taua
e) o'o	-	isi alii
i) alaga (4)	-	tulafale
o) ivi muliulu	-	tamaitai
u) ulu	-	taulele'a

A. **Manufata** - (faasafune/sae/fai maio): E muamua lava ona ave'ese alaga e fa o le puaa, ona faafao foi lea. Vavae taamilo, e afua mai i lalo ifo o taliga, ona fa'aaoga lea o le aga'ese (naifi) ma tosi sa'o i luga tonu o le tuasivi, e amata mai i le vaevaega lea ua fai i lalo tonu ifo o taliga. Tosi sa'o seia o'o i tua i le nofoi. Laga le isi pito ma sae malie mai lava i luga, seia oo ifo i lalo i le manava. E faapena foi i le isi itu, ona faato'a vavae ai lea o maio i vaega na sa o le puaa, ona vavae foi lea o le puaa e pei o le faasinoga ua ta'ua muamua.

E iai lava nai 'ese'ese lava i totonu o afioaga, ae lelei pea ona vaai poo le a le faasoa ua masani lo outou nuu, ona faapena lea ona mulimuli ai, aemaise lava i le inati o tamaitai.

3. **I'a:** E iai le upu e masani ai tatou e faapea; "E ta'a le manu i le tuasivi, e lele foi le manu o le vateatea, ma ta'a le i'a i le moana sausau, a uma ona faasoa. E faapena le uiga moni o le soifuaga faa Samoa. O le tulaga la i le faasoaina o i'a o le sami, e 'ese'ese lava nuu ma a latou faasoa ma vaega o ia e faatauaina, ae o le a le avea le faasoa a la tatou polokalame e suia ai faiga masani i totonu o afioaga o lo tatou atunuu.

A. **Atu (Mata):** Pe a polo le atu mata, e muamua ona e tago e faatafa le i'a, ona e vaai lea i le mea lena e pei se tapili o le i'a, sulu ai iina le naifi agai atu i luga i le ulu o le i'a. A tau i luga i le vaega malo i lalo ifo a pao'o o le i'a, ona e tago lea e faataliaga le i'a ma tosi mai autafa agai i lalo i le mea o loo i ai si pu laitiiti lava. A oo mai iina le naifi, ona e tago foi lea, toe faatafa le i'a, ae fai foi e pei o le isi itu. O loo pipii pea fuilauvi o le i'a ma le fe'afe'a (gaau o le i'a) Tago lou lima i totonu o le gutu o le i'a ma momotu mai le vaega tonu lea e amata mai ai fuilauvi, o loo pipii lelei i le ponai (ivitu) o le i'a. A motu mai le vaega lena, ona e tago lea e fa'aaoga le naifi e titipi ai le pito malo o loo pipii i pa'o'o (aua le fa'aaogaina lima ne'i afaina) ona o ese atoa lava lea o fuilauvi ma le fe'afe'a po o le ga'au o le i'a. ona taatia mai lava lea o le i'a, ua uma ona aisa. Ona e tago loa lea e polo le i'a. E iai le talitonuga o la tatou polokalame, e taua le ulu o le atu pe a mata, ae o le ma'alo pe a vela. O le faiga o le ulu, e ave'ese uma lava io alo ma le isi io tua, ae vavae se vaega o le isi io tua, pe tusa ma le fa inisi lona umi, e pipii ai pea i le ulu. E

taua lena faiga, o le “Faasei” ona ave lea i le faifeau po o se alii taua o le nuu.

Faasoaina: atu

a. Ulu (faasei) - faifeau/alii taua

e. Ma’alo (vela) - faifea/alii taua

i. Io tua - isi alii

o. Io alo - tulafale

Malauli/Ulua Ulu - faifeau/alii taua

Isi vaega - alii/tulafale

4.ULA:tue - faifeau/alii taua

Agagi - tamaiti

5.TUALA-(faaivi) - faifeau/alii taua

Lautamanu - isi alii

6. ALAGAVAE - Vasasui- faifeau/alii taua

Ponaivi (alaga) - tulafale

(vasasui – o le aano o loo i le va o ponaivi e lua)

7. ALAGA LIMA-i’ufoe - faifeau/alii

Ponaivi - tulafale

8. PUSI (maoa’e) ulu - faifeau/alii

Isi vaega - tulafale

9.TUNA -siusiu - faifeau/alii

Isi vaega - tulafale

10. I’a sa - Saga mua- faifeau/alii

Saga muli - alii/tulafale

O nai fesoasoani na o la tatou polokalame i nisi o a tatou nafa faa-talavou, ua tauau ina tatou le iloa ona lufilufi ma faasoa. A iai ni vaega e le o manino lelei, fesili ane pea i le tama faifeau, aemaise o le au matutua o lo outou afioaga.

Ia manuia tele le tatou aganuu!!!.

.....

ASO SA: 15 APERILA 2018

**MATAUPU: UA MAFUA I SE A ONA TOATELE
TUPULAGA O LE E.F.K.S. UA O
ESE ATU I ISI TAPUAIGA?**

O le tasi lenei o faafitauli ua matauina le faatupulaia pea i le tatou Ekalesia - o tupulaga talavou ua o ese mai le tatou Ekalesia ae ua auai ma lolotu i isi Ekalesia. O le fesili e fia tulimata'i e lenei mataupu: o le a le **mafuaaga** ua o ese ai nei tupulaga talavou? (Afai e le o tupu i le tou Autalavou, e le afaina lea, ae taua pea le fetufaai e mau manatu ai le Autalavou mo le agai i luma).

FAATINOGA O LE MATAUPU:

1. E fautuaina ia umi se taimi e faaali ai manatu o le Autalavou e uiga i lenei fesili –

**UA MAFUA I SE A ONA TOATELE TUPULAGA O LE
E.F.K.S.**

UA O ESE ATU I SI TAPUAIGA?

2. O le a se tatou galuega e fai ina ia foia ia faafitauli (pe afai o i ai)?

FESOASOANI:

O nisi nei o mafuaaga e masani ona faalogoina e mafai ona fesoasoani i tali ua aumai:

1. *Tavita ma Ionatana*: O Ionatana o le atalii o Saulo le tupu muamua o Isaraelu. Na tiga lava le maemaea o Saulo e fia fasioti ia Tavita, e lei suia ai le loto o Ionatana i le la faigauo ma Tavita. E tele auala na taumafai Saulo e fasiotia ai Tavita ae na faasaoina e Ionatana. O le isi lea vaivaiga o nei mea o faigauo. E vaai atu loa ua lamatia le ola o le uo, tei lava ua solasola ese. A le o le na foi, ua taumafai ai ma ia e fai se auala e maua ai lana uo. O le tala ia Ionatana ma Tavita, e lei faapena. Na sili atu le alofa o Ionatana ia Tavita, i loo le mea sese o loo taumafai ai lona tama. Aua e leai lava se loto o Tavita pe ana fai e fesoasoani Ionatana e faataunuu le ita o Saulo.

2. *Iesu ma Peteru*: O Peteru o le soo faamoemoeina o Iesu. O le tele o fesili a Iesu, o Peteru lava e tali atu. Peitai, na faafiti Peteru i lana uo o Iesu, ina ua vaai atu ua oooo faafitauli ia Iesu. O lana tali: ou te le iloa lona tagata. Ua le iloa le uo sa la galulue, momoe, aai ma savavali faatasi i le tele o aso. Peitai, o le taua o lenei faigauo mo i tatou le tupulaga talavou. O le toe foi mai o Peteru. E ui lava e salamo ane Peteru ua toe maliu Iesu i le lagi, peitai, ua lava lana molimau atu e fa'aauau le Talalelei i lana uo e fai ma pine faamau o lona loto ua faamaoni i lana uo o Iesu.

3. *Aperaamo ma le Atua*: O tagata uma e tataua ona faauo i le Atua. E tele foi isi tala o loo iloa ai i latou e faauo i le Atua. O i latou uma e faauo i le Atua e le pine le tele o faamanuiaga latou te maua, e pei foi o Aperaamo. Na manuia ai lona aiga, o lona nuu ma ona tagata e oo mai ia i tatou, ona o lona Filifili e faauo i le Atua.

Faamanatu: Ia tatou faauo i le Atua e manuia ai o tatou olaga.

5. Afai e leai, e tatau ona faamaoni, aua o i tatou o tagata galulue mo le fa'aauauina o galuega ua finagalo i ai le Atua.

Faamanatu:

Ua ui mai e Iesu lana 'ula, ina ia tatou fa'aauau lana galuega.

ASO SA: 6 ME 2018

**MATAUPU: O LE UI'I FAAMAUMAU'OA –
Luka 15: 11-32**

O le tala ua masani ai le faalogo, e lauga soo foi e le au failotu. Peitai, e i ai nisi vaega e le o oo i ai le lauga ma le taua e nisi ona o le utiuti o le taimi. Ao le tatou suesuega o lenei Aso Sa, o le toe auiliili lea o lea tala masani poo a foi ni a'oa'oga mo i tatou. O nisi ia o vaega e faaautu i ai le talanoaga o lenei aso:

1. O le tala ua na o se faataoto. O le a le uiga o lea upu FAATAOTO?
2. Aisea ua le taua ai ni fanau teine i le tala ae na o fanau tama?
3. Aisea ua le taua ai se tinā?
4. O le a sou iloa i le uii, o se tamaititi Kerisiano pe leai?
5. O le a le agasala a le uii lea e taua i le f.18?
6. Na faafeiloai e le tama lona atalii ao ofu ona ofu namu pa puaa e lei talaia. O le a sou iloa i lea mea?
7. O le a le uiga o le mama i le lima o le atalii?
8. O le uii na leiloa ae ua toe maua, ae a le ulumatua, o fea lea e leiloa ai?

O nisi ia o fesoasoani mo lau Susuga i le Faimataupu:

1. *O faataoto, o tala ua faamatalaina ina ia faamanino ma faamalamalama atili se mataupu taua e tatau ona iloa e tagata uma. O le tasi lea o metotia a Iesu i lana galuega tala'i, o le*

faaogaina lea o FAATAOTO. O le tala e faamatala ina ia malamalama atili se tautalaga sa faia muamua. O nisi o faataoto o le Feagaiga Tuai – Faamasino 9: 7-20, 2 Samuelu 12; 1-9, ma isi. O le Feagaiga Fou, o loo tele foi faataoto na fetalai ai Iesu, mo le malamalama atili o le au faalogologo. O le tala i le uii faamauamau’oa, o le faataoto e faataatau i le alofa faale-Atua mo le mamoe na se poo le tagata e se ese ma ala o le Atua ae mulimuli ane ua salamo ma toe foi atu i le Atua ma le loto salamo.

2. *Aisea na le taua ai ni fanau teine i le tala, a ona o fanau tama lea e taua (f.11).* O le tu ma le aganuu faalutaia, o fanau tama e i ai lo latou tofi i meatotino a le aiga e pei o fanua, suafa, o le tamaoaiga ma isi lava mea. O le uiga foi lea e faataua ai lava i le aganuu faalutaia, le i ai o fanau tama i soo se aiga. O lo latou talitonuga, o fanau tama latou te fa’auauina gafa o aiga. Ao le teine, e i ai le taimi e fai ai lona toalua ma alu ese ma le aiga ona muta lea o lona sootaga malosi i meatotino a le aiga. O fanau teine, e i ai le taimi e suia ai lo latou faaiu – e faaiu i le toalua poo le tama o le toalua, ona muta lea o lona tauaveina o le suafa o lona tamā poo lona tupuaga. (O lea foi e iloa i le tatou aganuu). O le mafuaaga lena o le le taua o ni fanau teine. O le talitonuga o le tusitala, ua na o fanau tama e maua lo latou vaega’oa pe a vaevaeina le tamaoaiga o le aiga.

3. *O le uii o se tamaitiiti e Kerisiano lona aiga:* Fuaiupu e 17-19, o loo faamatala ai lagona o le salamo na oo ane i le uii ina ua malamalama lona mafaufau i le mea ua tupu. O le fesili faatupu manatu mo i tatou le Autalavou: E mafai e se tagata faapaupau poo se tagata e le talitonu i le Atua ona lagona le salamo? Atonu e mafai, ao le soifuaga lenei tatou te i ai, e leai.

Seia vagana le tagata ua talitonu i le Atua ma ia iloa le taua o le salamo.

4. *O le a le agasala a le uii lea e taua i le fuaiupu e 18 -lou tama e, ua ou agasala i Le o i le lagi atoa ma ou luma.* O le Luka 15 o loo faaulutalaina – o le faataoto i le mamoe na se. Ua aumai ai le ata faatusa, o tagata o mamoe ao le Atua o le leoleo mamoe. Afai e se ese le mamoe mai ala o le leoleo mamoe, e saili lava e le leoleo mamoe ina ia faasaoina. E tusa lava poo le sapatu, e pei ona manatu le au faresaio ma le au tusi upu e le faia ai se galuega, e galue pea le leoleo mamoe, ona o le alofa i ana mamoe. Peitai, o le faataoto i le uii faamaumauoa, ua aumai le ata o le mamoe, ua filifili lava ia e alu i ona ala ae tuu ala o le leoleo mamoe. O lea la ua lagona e le uii lona sese ona ua sese lana faaiuga ua fai. O lana agasala lea i lona manatu, ua le usitai i ala o le Atua poo le leoleo mamoe. O le uiga ia o ana upu, ua ou agasala i Le o i le lagi atoa ma ou luma. O lagona o le salamo ma le faatauva, ina ua sese le faaiuga ua fai. I lona talitonuga, o le lē usitai i lona tamā, o le lē usitai lava lea i le Atua.

5. *E lei tatalaina ofu namu pa puaa o le uii.* Ina ua taunuu atu le atalii i le aiga, na faafeiloai e le tamā. Tiga lava le manogi pa puaa o ona ofu, ae na fusi lava ma faafeiloai. Ona fai lea o le faatonuga, e faaofu le atalii i se ofu talaloa, faasee i ona vae, ma tuu se mama i lona lima, e fai ma faailoga o le talia ma le fiafia o le atalii i le mafutaga o le aiga e ui lava ina leiloa ae ua toe maua. E leai se faatonuga e sui le ofu i le ofu fou. Na pau le faatonuga, ia faaofu i se ofu fou. O le talitonuga, o le au Suesue o le Tusi Paia, e le'i aveeseina le ofu manogi pa puaa o le atalii na sau ma ia.

6. *Aisea ua naunau ai le tama e tuu le mama i le lima o le atalii?* O le mama i le lima o le atalii, o le faailoga o sootaga

ma mafutaga mafanafana ua faamaufaaailogaina. Ua toe maua le mafutaga ma le atalii sa leiloa.

7. O le ulumatua o loo leiloa i le mafutaga i totonu o le aiga. O ia o le ulumatua, e tatau ona faapalepale. Sa tatau foi ona fiafia ua toe sau le uso. Peitai, e leai. Ua sili ia te ia le toesea o le tamaoaiga i loo le uso ua toe maua. O a mai tatou, o fea lea tatou te leiloloa ai?

Faamanatu: O loo faatalitali mai le Atua, i le taimi ma le itu aso tatou te foi atu ai ma le loto ua salamo faamaoni.

.....
ASO SA: 13 ME 2018 (ASO SA O TINĀ)

MATAUPU: O LE TĀUA O TINĀ

O le tasi lenei o Aso Faapitoa taua i le kalena a le au Kerisiano, o le Aso Sa o Tinā. O le tele o tusitusiga e uiga i lenei aso, e tagatasi lava le faamoemoe, o le faamanatuina lea o le taua o tina i totonu o aiga ma faalapotopotoga eseese o loo galulue ai. O le faamoemoe o lenei mataupu, o se toe faamanatu i le sao taua o nisi o tinā o le Feagaiga Tuai i le tala faasolopito o Isaraelu aemaise o le Tala lelei ia Iesu Keriso.

FAATINOGA O LE MATAUPU:

1. Vaevae le Autalavou i vaega e lua.
2. Faitau manino i tala ua filifilia ma faamatala manino le sao taua o nei tina i le tala faasolopito o Isaraelu faatasi ai ma le Talalelei ia Iesu Keriso, lea ua tatou sapi ai nei.
 - i. O Eva – Kenese 3: 1-15
 - ii. Sepela ma Pu’a – Kenese 1: 15-21.
 - iii. O le afafine o Farao – Esoto 2: 1-10
 - iv. Ruta le fafine Moapi – Ruta 1:16

v. Raava – Iosua 2: 8-24

3. Ia faatauina taitasi e taitai susesuega ma tali a latou vaega e tusa o fesili o loo taua i luga.

4. Saunia le lau Susuga le faimataupu se upu faaiu o le mataupu ma ia manino pea le Autalavou i le taua o tinā i totonu o aiga, o nuu ma Ekalesia.

Faamanatu: Ia faafetai i le Atua, ona o tinā lelei ua tatou maua i lenei olaga.

ASO SA:
27 ME 2018

MATAUPU: APERA’AMO MA LE TAULAGA I MORIA

1. Ia fetufaai le Autalavou i fesili e pei ona taua:

i. O le a sou taofi: Afai o oe o Aperaamo, o le tamā e toatasi lou atalii, o a ni lagona e oo ane ia te oe pe afai e fai atu se tagata e aumai lou atalii e osi ai le taulaga?

ii. (2) O oe o Isaako, o le a sou lagona ina ua oo atu i Moria e leai se mamoe e osi ai le taulaga?

iii. (3) Ua leai se mamoe e osi ai le taulaga. A o lea ua valaau atu lou tama ma ta’u atu ia te oe le mea o le a fai: o le a osi le taulaga ia oe. Faamata e ono i ai se feteenaiga i le va o oe ma lou tama ona o lea manaoga ua ta’u atu? O le a sou lagona?

iv. E lelei ‘ea i lou taofi lenei poloa’iga mai le Atua, ina ia osi atu se taulaga ia te Ia ae fa’aaoga iai se tagata?

FESOASOANI:

1. Ia silafia, o taulaga e ofo ai tagata poo fanau, o se faiga na taatele i po na soifua ai Aperaamo. O le tasi lea o talitonuga ma

faatinoga sa ta'atele i le vaiata o Aperaamo, aemaise lava i tagata ma tapua'iga i atua 'ese. O ia tapuaiga ese, e iai lava le taimi e fai ai taulaga i o latou atua ma ofo atu ai tagata po o fanau e fai ai taulaga mu. E vavalalo fo'i o latou perofeta ma fa'aailoa i tagata le taimi e manana'o ai o latou atua ina ia osi taulaga i se tagata po o fanau. *Lea la ua fetalai mai le Atua ia Apera'amo ina ia 'ave lona atali'i. Faamata e le o le isi lenei mafaufauga na le fesili ai Apera'amo i le Atua e tusa ma lona finagalo?*

2. O loo tumau pea le talitonu i galuega lelei na faia e le Atua mo ia. Ua leai se tala a Kenese pe sa faapefea ona talia e Apera'amo le vala'au mai le Atua ina ia 'ave lona atali'i, o lē ua pele ia te ia ina ia osi ai le taulaga. E tasi le mea ua tusia mai, "Ona ala tula'i lea... ile taeao, ma fa'a nofoa lana asini..." (*Ken 22: 3*). O lona uiga, ua leai lava se fesili; ai lava o lona talitonu ma le fa'atuatua i le Atua lea sa ia tu'ua ai lona aiga i Karana, lea fo'i ua ia lē gagana ai ina ua fetalai mai le Atua ia faia lenei mea faigata.

Sa le taunu'u le taulaga ina ua lavea'i le tama e le Atua. Peita'i, ua tatou maua lava le ata ua fa'ata'imua ai le uiga o le maliu o Iesu, ina ua ofo atu o Ia e Ia lava e fai ai le taulaga mo agasala. Sa fa'asaoina Isa'ako, ae le'i fa'asaoina Iesu, "O le Atali'i pele...ua fiafia iai le Atua".

3. O Isa'ako ma le taulaga ile mauga o Moria. E tupu le mea lenei i le mauga o Moria, pe tusa ua 25 tausaga o le tama o Isa'ako. Ua malosia le tama, a ua toea'ina lona tama. O lona uiga, sa loto lava le tama ile mea ua mana'o iai lona tamā. E le'i te'ena lava e Isa'ako le noanoatia o ia ma le fa'ata'oto o ia i luga o le fata faitaulaga.

4. O le isi tala tu'u a Iutaia e fa'apea mai, o le mafua'aga na po ai lana va'ai ona sa sisina ifo loimata alofa o agelu a o ta'oto le

tama ile fata faitaulaga. O le ala lea sa po ai lana va'ai ina ua toea'ina. Ua mautinoa fo'i, na o Isa'ako lava e le'i toe alu ese mai Kanana. E le pei o Aperamo ma Iakopo, e iai taimi sa tu'ua ai Kanana ae o ifo i Aikupito.

E tele lava ata ua tusia ma ua tatou va'ava'ai iai, o lo'o molimau i le faiga o le taulaga lenei. O lo'o tusia ma vali e tagata tusi ata le ata o le tamaloa toea'ina (Aperamo), ma le tamaitiiti (Isa'ako), ma le mamoe.

5. O le taulaga lenei i Moria, na iloa ai e le lalolagi, e le finagalo le Atua ina ia osi taulaga ia te ia ini tagata. O le 'ese'esega tele lenei o le Atua silisili mai atua o lo'o tapua'i iai tagata faapaupau e pei ona faia muamua.

.....

ASO SA: 3 IUNI 2018

MATAUPU: O FAATAOTO A IESU – Mataio 13: 1-58

E fitu faataoto lea o loo taua i le mataupu lenei e 13, o le tusi o Mataio. O Faataoto uma nei a Iesu e faatatau i le malo o le lagi. Aemaise foi o le manuia o le tagata e sao i le malo o le lagi e pei ona tausinio i ai le Kerisiano uma. O loo fa'aaogaina lava e Iesu, galuega ma faatinoga o aso uma e faamatala ai ana faataoto. O loo taua foi laau o le siosiomaga e masani ai le vaai a tagata faalogologo i lea aso. O le faamoemoe maualuga, ia malamalama tagata uma, e oo a tamaiti.

O le mataupu o le Aso lenei o le a tatou vailiili ai ma toe to manatu i le taua o nei faataoto e pei aoao mai Iesu.

FAATINOINA O LE MATAUPU:

1. E lelei ae vaevae le Autalavou i vaega e 4 (taito'atolu pe to'afa fuafua i le toatele o le Autalavou).

2. Tofu le vaega ma le faataoto e faitau ma sailiili i le uiga o faataoto e pei ona taua i lalo:
 - i. Faataoto i le lulu saito – f4-23
 - ii. Faataoto i le titania ma le saito – f24-30 ma le Faataoto i le upega fagota – f47-50
 - iii. Faataoto i le fua o le sinapi – f31-32 ma le Faataoto i le mea faafefete – f33
 - iv. Faataoto i le oa na natia – f44 ma le Faataoto i le penina lelei – f45-46
3. A maea le 15 minute, ona tolaulau lea e taitai o vaega taitasi le iuga o le latou suesuega sa faia.
4. Ia manino le faamatalaina o le fesootaiga o le faataoto ma le malo o le lagi.
5. Ia saunia ni a’oa’oga mo le Autalavou.

FESOASOANI:

1. f.4-23. O le faataoto i le manuia o le tagata e faalogo ma talia afioga a le Atua. Ua faatusaina lea i le eleele lelei ua pau i ai le fatu, e tupu ma fua mai e taiselau, taiono gafulu ma taitolugafulu. Ia avea o tatou loto e fai ma eleele lelei e pau i ai afioga a le Atua, ina ia tupu ma fua mai i a tatou amioga o aso uma.
2. f. 24-30. O le lalolagi e le mafai ona o eseese leaga ma lelei. O fea lava e i ai lelei e tatau foi ona i ai ma leaga. Fetalai manino Iesu, e i ai lava le taimi e iloa ai le iuga o i laua ia. E tuueseeseina lava i le faamasinoga amiotonu a le Atua. Ia tatou tumau pea i le finagalo o le Atua aua e i ai lava taimi o le seleselega.
3. f.31-32. Fua o le sinapi – e laititi, ae ua faatusa i ai le malo o le Atua e amata o se mea faatauvaa i le vaai a nisi, ae tupu ae

ma faaolaina ai tagata uma o le lalolagi. Fetalai Iesu a oo ina tupu, e mapu i ai manu felelei uma o le vao.

4. f. 33. O le malo le lagi ua faatusa i le mea faafefete na te faafefete ma faatele le paluga falaoa e lei faafefeteina. E foliga tutusa le faataoto lea ma le fua o le sinapi. E amata i se mea faatauvaavaa/ e laititi i le vaai, peitai, faasolo ina tupu ma tupu tele le malo o le lagi.

5. f.44. O le oa na natia na maua e le tagata, ona ia faatau lea ma manuia ai. E faapea le manuia e oo i le tagata ua ia talia Afioga a le Atua e sao ai i le malo o le lagi. E tele faamanuiaga na te maua. O le malo o le lagi, o le oa na natia. E manuia le tagata na te maua ma taliaina i lona loto.

6. f.45-46. E foliga tutusa faataoto nei e lua. O le faataoto i le penina tau tele, ua maua e le tagata, ua ia faatau atu ma manuia ai. E faapena le tagata ua ia faalogo ma talia Afioga a le Atua ma tumau ai. Na te maua le manuia i le malo o le lagi.

7. f.47-50. O le faataoto lea e uiga tutusa ma le faataoto i le saito ma le titania. O ia lelei e fa'aaoga, ao ia leaga e tiaiina. O le taimi o le faamasinoga a le Atua, e talia ma filifilia i latou e lelei mo le malo o le lagi, ae lafoa'iina i latou e leaga.

Faamanatu: E fai mo i tatou le malo o le lagi, pe afai tatou te OLA IA KERISO.....

.....

ASO SA: 10 IUNI 2018

MATAUPU: O LOU TAGATA LILO

O le tagata lilo (inner person) e faasino i le loto o le tagata. E manatu le mataupu, e faigata ona iloa le tagata lilo o le tagata

soifua. Peitai, e mafai ona iloa i ana faatinoga e faia. O ana taga ma tala e fai, o iina e mafai ona iloa ai le mea o loo i ai lona loto.

FAATINOGA O LE MATAUPU:

1. Vaega muamua – saili mai ni tala se lua o le Tusi Paia o loo taua ai ni tagata lilo lelei – (galuega lelei). Vaega lua – saili mai ni tala se lua o le Tusi Paia o loo taua ai ni tagata lilo le lelei – (faatinoga le lelei).

FESOASOANI:

O nisi ia o tagata o le Tusi Paia, e mafai ona faamatalatala e lau Susuga i le faiaoga i le amataga e faamalamalama ai le mataupu, ao le'i faia le faatinoga.

TAGATA LILO LELEI:

1. *Tavita: 1 Samuelu 24: 1- 7, 26: 5-12.* O Saulo e taulamalama ia Tavita, ao Tavita, e musu e faaoo le leaga ia Saulo. Na mafai ona iloa ia uiga o Saulo, ina ua ia velo Tavita i le tao, ma le fa'amoemoe e oti. Na ia saili foi i le vao e fasioti, peitai e lei mafai ona ia maua. O Tavita e loto faamagalalo ia Saulo. Na iloa ia uiga o Tavita, ina ua ia maua faalua Saulo o momoe ma lana autau peitai na te le'i faaooina i ai le oti. E tiga lava ona fautua i ai lana autau, ae lei mafai lava ona maluelue ai le loto faamagalalo o Tavita.

2. *Ruta: Ruta 1: 6 – 17.* O le maliega a Ruta e mulimuli pea ia Naomi, na iloa ai lona tagata lilo. O ia o se tagata e loto alofa ia Naomi le tina o lana tane. E moni lava o ia o le fafine o nuu ese, ua leai foi se tane e toe maua e Naomi, peitai, e lei

solomuli ai lona alofa ma lana tautinoga, o le mea lava e oti ai Naomi e oti ai foi.

3. *Aperaamo: Kenese 12: 1-9.* E tele lava vaaiga e iloa ai le loto atu o Aperaamo i feau e finagalo i ai le Atua. O le tala iloga lava i lona tuua o lona nuu ma lona aiga, ae alu i le nuu e faasino atu e le Atua (Ken 12). O le tala i le fetalaiga a le Atua e osi le taulaga e fa'aaoga ai lona atalii, o le tasi lea o tala iloga i le ola faatuatua o Aperaamo. E lei mafai ona tatou iloa Aperaamo o se tagata usitai ma faatuatua i le Atua. Peitai, ua avea ana galuega ma faatinoga, e fai ma molimau o lona loto atu i le finagalo o le Atua.

TAGATA LILO LĒ LELEI:

1. *Kaino: Kenese 4: 8-11.* O Kaino ma Apelu o le au uso. O uluai fanau ia o le Tusi Paia ma lelalolagi. E lei iloa le ita o Kaino ia Apelu ina ua maea ona osi a laua taulaga i le Atua. Peitai, na iloa le tagata lilo o Kaino ina ua ia fasioti ia Apelu. O le gaioga lea ua tatou iloa ai le ita sa faatumulia ai le loto o Kaino ona o le taulaga a Apelu ua faamuina ao ia e le'i mu lana taulaga.

2. *Nepukanesa: Tanielu 4: 28-33.* O Nepukanesa o le tupu o Papelonia. O Papelonia, o le tasi lea o malo na faataga e le Atua, latou te faapologa Isaraelu ina ia aoaoina le mafaufau o le Isaraelu faalogogata. Peitai, ina ua mautu lona malo ona o le malosi o tagata Isaraelu, na fiafia Nepukanesa ma ia faapea ai: O le malo lenei na ou faia i lou malosi ina ia viia ai lou igoa. Ua galo ia Nepukanesa, o le Atua o ia na faatagaina o ia e faaaoga le malosi o Isaraelu e fausia ai lona malo. O lona uiga, o le viiga o le mea lea e tatau i le Atua, ae le o ia. O lona loto mimita ma le faafefeteina na iloa ina ua ia saunoa ma tautino le matagofie o lona malo e fai ma ona viiga.

3. *Pilato: Mataio 27: 11-26.* O Pilato o le tasi lea o alii sili na ia faamasino ia Iesu. Ua fiu Pilato e saili se mea e tatau ona molia ai Iesu peitai, ua leai lava se mea. Ona ia fafano lea o ona lima ma fai mai: ia faitalia outou ma le toto o lona tagata. O le fafano o lima o Pilato, o le faailoga, o lona manatu, o ia ua mama mai le sala a Iesu. E le o ia e ana le faaiuga o le a faia, ae o le motu o tagata. O lona uiga, ua iloa lelei e Pilato e leai se e sala ai Iesu.

Peitai, e le'i mafai e Pilato ona ia faasaoloto ia Iesu. E leai foi se galuega na faia e Pilato e taumafai ai ina ia fa'ailoa le amiotonu o le le sala o Iesu. Ae ua ia iloa ma nofonofo ai faapea. O le tasi lea vaivaiga o nei aso. O le iloa o le mea e tatau ona fai ae ua le faia, ona o le fefe i le tauvalea ma upu fai mai a tagata.

Faamanatu: Ia avea o tatou tagata lilo e fai ma viiga o le Atua ae le o le ta'uvalea.

.....

ASO SA: 17 IUNI 2018

MATAUPU: NUMERA O LE TUSI PAIA.

E tele fuainumera o loo taua i tala o le Tusi Paia. Manatu ua silafia e nisi le uiga o nisi o numera. Ae taua le toe faamanatu o numera ma o latou uiga i lenei Aso Sa mo le silafia pea e i tatou le tupulaga talavou. E tele ma anoanoai numera o loo taua i le Tusi Paia, ae o le a fa'aaoga na o se vaega mo le faasaoina o le tatou taimi.

FAATINOGA O LE MATAUPU:

1. Vaevae le Autalavou i vaega e lua. Saili e le vaega le uiga o nisi ia o numera o loo taua i tala o le Tusi Paia ma saili mai ni tala o le Tusi Paia o loo taua ai ia numera: 2, 3, 4, 7, 10, 12, 30, 40, 50, 70.

FESOASOANI MO LE FAIAOGA:

1. # 2: faailoga o le felagoalagoma'i ma le galulue faatasi (support) – Kenese 1:16, Esoto 25: 22, Mataio 26: 60, Luka 10: 1, Failauga 4: 9.
2. # 3: ua atoatoa (completion, perfection) – Hosea 6:2, Mataio 12:4, Luka 13:7, Ioane 2:19.
3. # 4: ua atoatoa (complete/perfection) - Kenese 2: 10, Faamasino 11: 40, Iopu 42: 16, Esekielu 37: 9.
4. # 7: ua atoatoa (divine complete/perfection) – Kenese 1, Iosua 6: 3-4, 2 Tupu 5: 10, Mataio 13 (fitu faataoto), Faaaliga 2-3,
5. # 10: fa'aalia o le pule aoao a le Atua: mala e 10 – Esoto 7: 14-11:10, tulafono e 10 – Esoto 20, Faataoto i taupou, taleni, lepela e toasefulu - Mataio 25: 1-13, Luka 17:11-19.
6. #12: ua atoa le faitau – 12 ituaiga o Isaraelu, 12 le fanau a Iakopo, 12 soo o Iesu, Fa'aaliga 21: 19-21
7. #30: faailoga o le ofoina atu mo se galuega faapitoa (total dedication for a particular task) - 30 tausaga o Tavita ae avea ma tupu – 2 Samuel 5: 4, 30 tausaga o Iosefa na tulai ai e tali i nisi o tofiga mai ia Farao – Kenese 41: 46, 30 aso o faanoanoa Isaraelu mo Mose ma Arona – Numera 20:29, Teuterenome 34: 8. 30 tupe siliva na faalataina ai Iesu.
8. # 40: taimi o tapenaga mo se isi fa'amoemoe taua – 40 po ma ao na i ai Mose i le Mauga o Sinai ao taumafai mai

tulafono mo le nuu, 40 tausaga na avea ai Saulo, Tavita ma Solomona ma tupu ia Isaraelu, 40 aso na i ai Iesu i le vao. 40 tausaga o le malaga a Isaraelu i le vao. 40 tausaga o Isaako ma Esau faatoa faaipoipo – Kenese 25: 20, Kenese 26: 34

O isi o numera e masani ona fa’aaogaina o le 50 – Penetekoso, 70 na tofia e Mose (Numera 11: 16), 70 i latou na tofia e Iesu mo le talaiina o le feau o le Talalelei.

.....

ASO SA: 24 IUNI 2018

**MATAUPU: O IOSEFA LE FAAMATALA MITI -
Kenese 37: 5-11**

O le tala masani i le uii faapelepele a Iakopo poo Isaraelu e pei ona suia ai e le Atua. O le tala e faapea, e inosia Iosefa e ona uso aua ua sili le alofa o Isaraelu ia Iosefa i ona atalii uma. E le gata e inosia Iosefa ona o le alofa o lona tamā, ae ua sili ona inosia ona o ana miti e lua na faamatalaina.

O le fa’amoemoe o lenei mataupu, o le tatou sailiili e ala i se finauga – debate, poo le a se silafia o le Autalavou i mea nei:

1. Sa tatau ia Iosefa ona faamatala ana miti ia e lua: Ioe pe Leai – faamatala mai mafuaaga.
2. O miti a Iosefa o loo taua ai le ifo atu o matua ma ona uso matutua ia te ia. O le a sou lagona i lea faaupuga o le miti pe a tuu mai i le tatou aganuu? Se mea tatau le ifo atu o matua ma tagata matutua ia te oe?
3. Na tupu tele le ita o le au uso ona o miti ia e lua a Iosefa. Faamata e sa’o le taimi ma le auala (channel) na faamatala ma fa’ailoa ai ana miti?

4. Faamata e le o le isi lea mafuaaga o le tele o vevesi ma misa i nei aso (aiga, nuu, au lotu, atunuu ma isi)? O le sese o le taimi ma le auala (channel) e fa'ailoa ai o tatou lagona?

** Tapena lau susuga i le fai mataupu e faamopoopo tali a vaega e lua, ma ia manino se tali e iu i ai le fetufaaiga.*

FESOASOANI:

1. O miti a Iosefa e pei ona faamatalaina, o le finagalo lea o le Atua mo lona lumana'i. O le taunu'uga lea o lona olaga, e auaua ona uso ia te ia, e oo foi i lona tamā, na saili fesoasoani atu ia te ia. Na taunuu mea uma e pei ona taua i le miti.

2. Peitai, o le vaai a le tatou mataupu, e peiseai na tupu tele le ita o le au uso ona o le taimi ma le auala(channel) na faamatala ai miti. E le afaina i manatu le finagalo o le Atua e tataua ona faailoa. Ao le popolega, ua tupu le ita i loto o tama ia o le auala ma le taimi ua faailoa ai ana miti. O le mea mautinoa, o loo iloa e Iosefa le inosia o ia ona o le alofa faapito o lona tama ia te ia. O lona uiga, sa tataua ona tuu le faamatalaina o miti, seia i ai se isi taimi. E i ai lava laolao lelei e tataua ai ona faailoa ana miti.

3. O le auala (channel) na faamatala ai miti. O Iosefa e laititi, e inosia e ona uso, o le mea manino e leai se isi e fia faalogo ia Iosefa. E manatu le mataupu, sa tataua ona auala mai ia Iakopo lo latou tamā le faamatalaina o miti, pe faailoa i se uso matua, ona faailoa lea e le uso matua i lo latou aiga. Peitai, ua le faapena le manatu o Iosefa. O upu foi ma faaupuga o le miti, ua fai lava si ogaoga i le faalogo a le tagata matua, aemaise o lona tamā.

4. Ia fai se faataitaiga o se saunoaga a Iakopo e faailoa ai le miti a Iosefa, i se auala e mafai ona talia ai e le fanau.

.....

ASO SA: 1 IULAI 2018

MATAUPU: O APERAAMO, SA FILIFILIA E LE ATUA

Ua tatou iloa mai a tatou sa'ili'iliga se vaega o le tagata (Apera'amo) lē sa filifilia, a ua lauiloa o le tamā o le 'au fa'atuatua. Ae tele lava nisi mea sa tutupu i le soifuaga o Apera'amo o lo'o fa'amauina nisi i le tusi o Kenese; o mea lava ia e saga a'oa'o mai ai le uiga o le soifua mafuta i le Atua. E maualuga lava le manatu o le a mafai nei ona tatou faitauina tala i lenei toa o le Talalelei i se malamalamaga fou, ae maise la tatou savaliga e tau atu i le lagi.

O le mea lava e tatau ona tatou iloa, ua tusia mai nei fa'amatalaga uma, ina ia fai ma ta'iala mo tatou i le fa'aolataga. Tatou te manatu, o tatou lava o tagata e tumu i vaivaiga 'ese'ese, ma e fai lava lea ma fa'anoi (excuse) tatou te saga fa'avaivai ai ('o tatou uma lava e vaivai'), ona maua lea o le avanoa e pei ai ua sa'o le mea sese. Peita'i tatou te mafanafana pe afai tatou te finafinau e pei o lo tatou tamā o Apera'amo.

FAATINOGA O LE MATAUPU:

E lelei ona fesiligia pea le Aupalavou e fa'aali ni o latou finagalo ao le'i amataina le talanoaga:

1. Po o a ni agavaa sa ia Aperaamo na mafua ai ona filifilia o ia e le Atua?
2. O le a so tatou manatu ia i tatou o talavou e ola ia Keriso, po ua filifilia tatou e le Atua pe leai?

3. Ae faapefea o tatou vaivaiga, e le o se mea lea e faavaivaia i tatou e tali atu i le tofofi mai o le Atua?

FESOASOANI MO LE MATAUPU:

1. Po o a ni agava'a sa ia Aperamo na mafua ai ona filifilia o ia e le Atua?

E le'i filifilia e le Atua Aperamo ona o ni agava'a po o ni taleni, po o le amio, pe sa fa'apitoa o ia ile finagalo o le Atua. O le upu moni, o tagata uma lava o loo fa'aaogaina i le Tusi Pa'ia, e pei fo'i o Aperamo, sa filifilia ma vala'uina e lona finagalo pa'ia, aua na o le Atua na te mafaia ona fa'aaoga so se tasi ua ia finagalo iai. Pe agava'a pe leai, o le pule tu tasi lava lea a le Silisili Ese. Tau lava ina ia tatou fa'amaoni i mea uma ua tu'uina mai tatou te faia.

2. O le a so tatou manatu ia i tatou, ['O talavou mo Keriso'] pe ua filifilia tatou e le Atua pe leai?

Ua filifilia tatou e le Atua mo se fa'amoemoe taua, pe matua pe talavou, malosi pe vaivai, poto pe valea, po o le a lava le tulaga o tatou o iai. Tatou te lē o iloa i le taimi nei po o le a lona fa'amoemoe mo tatou; a o le uiga lea o le fa'atalitali ma le loto talitonu e pei o Aperamo ina ua vala'uina o ia. Afai fo'i tatou te fa'atalitali ma le loto talitonu ile Atua, o le a tatou iloa lava le fa'amoemoe ua ia filifilia ai tatou.

3. Ae a fa'apefea le mea nei; o a'u lava le tagata e tumu i vaivaiga 'ese'ese?

Sa fa'apea fo'i Aperamo; sa ia te ia le loto vaivai i nisi taimi. Muamua, sa 'ata'ata ina ua folafola mai le atali'i o le a fanau mai ia Sara lana avā (Ken 17:17).

Lona lua, e fa'alua ona pepelo o Sara o lona tuafafine (Ken 12:11-13, 20: 1-2, 5). Sa iloa lava e Aperamo e sesē le mea

ua ia faia, aua sa ia fa'asili le manatu i lona ola nai lō le Atua; ai o le mea lea sa ia tau fa'alalanu ai ile Ken 20: 12.

O le pona lea o tatou, aua tatou te fa'asili o tatou vaivaiga ma isi mana'oga nai lō le manatu i le Atua. O le malamalama lea e pupula malosi mai i le tala ia Aperamo; e leai se mea e sili a'e nai lō lona manatu i le Atua, e o'o lava i lona atali'i e to'atasi, na te le'i taofia ina ua fetalai le Ali'i ina e ave le tama e osi ai le taulaga. O le matagofie lea tatou te iloa e uiga i le Atua, na te tausia lava ana folafolaga uma, ua tala'ina mai fo'i ia i tatou le salamō ina ia magalo ai tatou, ma toe fa'afouina ai le mafutaga ma lo tatou Ali'i. E fa'amaoni le Atua i le folafolaga lenei; ua vala'auina tatou ina ia talitonu iai.

O le televave o le mana'o (Mana'o vave), o le isi vaivaiga lea e maua tele ai tatou le tupulaga. O le tafu'e fo'i lea o le tele o mea faigata e tutupu mai e pei o le ita, fa'ali'i, fa'aleaga mea, ma e o'o atu ai lava le mafaufau i le pule i le ola. O mea nei e leaga ai tagata, aiga, nu'u, Ekalesia, ae sili atu ai ona afaina le va o le tagata ma le Atua.

O le a se a'oa'oga mo tatou mai le tala ia Aperamo e mafai ai ona tatou taofia nei mea faigata?

E sa'oloto le ta'ita'i pe fa'atalanoa pe tusi le mafaufauga o le sui e tali ai le fesili lenei.

Ia manuia le Aso Sa.

.....

ASO SA: 8 IULAI 2018

MATAUPU: PE MAFAI ONA TATOU FAAFOE LE ITA?

O le ita o le tasi lea vailaau ua ia faaleaga olaga o tupulaga talavou i nei aso. O le tele o faafitauli ua aafia ai talavou e mafua lava i le ita aemaise lava i le faafitauli o le Pule i le Ola.

O le sauaina foi o fanau, o fafine, o tama ma faiga le alofa i isi tagata, e mafua ona o le ita. O le fesili: e mafai ona tatou faafoe le ita?

FAATINOGA O LE MATAUPU:

1. Fesiligia le Aualavou i so latou finagalo: Pe mafai ona tatou faafoe le ita?
2. Afai e Ioe (pe leai), ia faamalamalama ni auala e mafai ai ona faafoe ma ni auala e mafua ai ona manatu e le mafai ona faafoe le ita.
3. Ia manino se tali maoti e autasi i ai finagalo o le Aualavou.

FESOASOANI MO LE MATAUPU:

I le tusi o Iakopo 1: 2 - 4, ma le Roma 8: 28, 29, ma le Kenese 50: 20, e aga'i uma nei tusi i le manatu "O le Atua e silisili ese o Ia i mea uma" e o'o lava i tagata e fa'alavelave i o tatou ala. O mea uma e tutupu ia i tatou, e fa'atupu e le Atua, pe fa'ataga fo'i e le Atua. E ui ina e foliga mai e fa'ataga e le Atua mea leaga ina ia a'afia ai tagata, e fa'amaoni lava Ia, na te fa'alelei ina ia manuia ona tagata.

O le Atua o le Atua Lelei (Salamo 145: 8,9,17). Afai tatou te mafaufau i lenei upu moni se ia o'o ina alu ese mai o tatou ulu ae ulu atu i o tatou fatu, ona suia ai loa lea ma le ala tatou te tali atu ai ia i latou o e fa'a tiga mai.

E mafai ona tatou fa'afoe le ita mai le Tusi Paia pe a tatou fai se avanoa mo le to'asā o le Atua; e taua tele le manatu lenei pe a oo ina iloa le amio leaga po o soli tulafono, e fa'aleaga ai e tagata amio leaga tagata amiotonu (Kenese 50: 19, Roma 12: 19), o lo'o lapata'i mai nei tusi ina ia fa'aeteete tatou mai lo tatou fia atua. E amiotonu le Atua, ma ia tatou talitonu ua ia silafia mea uma, o Ia lava na te faia le fa'amasinoga tonu (Kenese 18: 25).

E mafai ona tatou fa'afoe le ita mai le Tusi Paia ina ua tatou tau ai le leaga i le lelei (Kenese 50: 21; Roma 12 : 21). O le ki lea na te liua le ita i le alofa. E pei ona tafe mai le loto a tatou fa'atinoga, e fa'apea fo'i ona liua o tatou loto ona o a tatou fa'atinoga (Mataio 5: 43 48). O lona uiga, e mafai ona suia o tatou lagona aga'i i le isi, pe afai tatou te suia a tatou filifiliga i ala tatou te tali atu ai i lea tagata.

E mafai ona tatou fa'afoe le fa'afitauli mai le Tusi Pa'ia e ala i feso'ota'iga (communication). E fa (4) ni ala o lo'o aumai e le tusi o Efeso ua pei o ni tulafono mo feso'ota'iga (Efeso 4: 14, 25,32).

Ia tautalatala fa'amaoni (Efeso 4: 15, 25). E le mafai e tagata ona faitau o tatou mafaufau o le mea lea e tatau ai ona tautala fa'amaoni. Be honest and speak (Efeso 4: 15, 25).

Ia mafa totoga i le taimi nei (Efeso 4: 26 to 27). Aua ne'i avea ma fatu e tupu i totonu ia i tatou le tiga o mea ua mavae, aua e o'o ina le mafai ona tatou pulea. E taua ona fa'amafolafola fa'afitauli a o le'i o'o i tulaga faigata.

Ia fa'asaga i le fa'afitauli ae le o le tagata (Efeso 4: 29 to 31).

Ia tautuana ina ia taofi o tatou leo i le malu e logo lelei (Fa'ata'oto 15: 1)

Ia galue i le fa'afitauli, ae le o le tali atu i le fa'afitauli (Act, don't react) Efeso 4: 31, 32. O lo tatou uiga faia'ina (fallen nature), e mafuli ai ina agasalala la tatou ulua'i tali i faigata (v 31). Ia faitau upu e sefulu, o le avanoa lea e manatu ai i ala fa'a le Atua e tali atu ai (v 32) ia manatua, ia fa'aaoga le malosi (energy) e ita ai ina ia talatala ai le mea faigata ua tupu, ae le o le fa'atupu ai o faigata e sili atu ona tetele.

Ia fa'afoe le ita i taimi uma i le faia o ni tua'oi e leoleoina ai le fa'a ono osofa'ia o tatou i nisi faaosoosoga. Ua a'oa'oina tatou

ina ia loto matala (1 Korinito 2: 15,16, Mataio 10: 16). Ia aua nei lafo penina i luma o pua'a (Mataio 7: 6)

O nisi taimi, o lo tatou ita e fa'asino ai tatou ina ia iloa tagata e le saogalemu ai tatou. E mafai ona tatou fa'amagalalo atu ia te ia, ona tatou filifili ai lea ina ia 'alo ese mai le toe feso'ota'i atu iai.

O le fautuaga mulimuli, e matua tatau ona galue ina ia mafolafola la tatou vaega o le fa'afitauli (Roma 12: 18). E le mafai ona tatou pulea le ala e tali ai e isi tagata mea faigata, ae mafai ona tatou faia suiga e mana'omia ona faia ia i tatou lava. O le pulea o le ita (temper) e le se mea e tupu vave; pe taumafai nei ae maua taeao. Peita'i o le tatalo, o le faitau i le Tusi Pa'ia ma su'esu'e iai, atoa ma le fa'alagolago atu i le Agaga Pa'ia o le Atua, e mafai ai ona ave'esea le ita i lou loto. Ai lava ua leva ona tatou toto le ita ma ua maua'a i totonu ia i tatou aua ua fa'a tele ona tatou fa'aa'oa'o (practice), peita'i, e mafai fo'i ona fa'aa'oa'o i le tali atu ile ala sa'o fa'a le Atua, se ia o'o ina ave'a fo'i lea ma a tatou masani, ona vi'ia ai lava lea o le Atua ona o la tatou tali atu i mea faigata.

E mafai, pe a tatou amana'ia ma ta'utino lo tatou uiga fa'asausili ma lo tatou ita e agasala ai (Faataoto. 28: 13; 1 Ioane 1: 9), o leni fo'i ta'utinoga e ao ona faia i luma o le Atua atoa ma nisi ua a'afia talu lo tatou ita. E le tatau ona tatou taumafai e fai ni fa'anoi (excuse) pe tu'ua'i (blame shifting) i se isi tagata mafua'aga o lo tatou ita.

E mafai ona tatou fa'afoe le ita mai le Tusi Pa'ia pe afai tatou te manatua o lo'o iai le Atua e fa'amasino tatou. E matua taua tele leni manatu pe afai ua afaina tatou ona o mea ua fai mai e nisi.

Faamanatu: E mafai ona tatou pulea le ita, pe a tatou mafuta i le Atua i le tatalo.

ASO SA: 15 IULAI 2018

MATAUPU: A MATUA LE TUINANAU UA FANAU LE AGASALA, A MATUA LE AGASALA UA FANAU LE OTI

E lelei le oa poo le tamaoaiga o le lalolagi, aua o le oa lea e mafai ona faatino ai a tatou fuafuaga o aso uma. Peitai, ua tutupu le tele o faafitauli ma aafia ai olaga o tupulaga, ona o le manaotele ma le manao le faamalieina i le tamaoaiga ua maua i lea taimi.

O le mataupu o lenei Aso Sa, o le a tatou faitau ai nisi o tala o le Tusi Paia o loo a’oa’o mai ai le leaga o le manaotele.

FAATINOGA O LE MATAUPU:

1. Vaevae le Autalavou i vaega e lua. Faitau ma sailiili i tala ua filifilia –

(1) Anania ma Safaira – Galuega 5: 1-11

(2) Napota ma Aapo – 1 Tupu 21: 1-16.

(3) Tanielu ma le lua o Leona – Tanielu 6: 1-24

(4) Iuta le Sekara – Mataio 27: 1-10.

2. Ia manino i sailiiliga a vaega e lua, le fesootaiga o le tala ma le autu o lenei aso.

FESOASOANI MO LE FAIAOGA:

1. Anania ma Safaira – Galuega 5: 1-11: O Anania ma lana ava o Safaira, o tagata faatuatua, na liua o latou loto i le galuega faa- Aposetolo a Peteru ma Ioane na faia ai le tutinoga, e faatau atu le fanua ae ave uma tupe i le au Aposetolo latou te tufatufaina i e matitiva. Peitai, ua tupu le manaotele i le loto o

Anania ma Safaira, ina ua vaai i le tupe ona nana lea o le isi vaega o le tupe ae ave le isi vaega ia Peteru ma le au Aposetolo.

O le manaotele i tupe ua afua ai ona pelogia le Atua i le tautoga na faia, e avatu uma tupe mo lana galuega. O le iuga o Anania ma Safaira na feoti i luma o le au Aposetolo.

2. Iesepela ma le tovine a Napota – 1 Tupu 21:1-16. O le tala i le manao o Aapo le tupu i le fanua o Napota, peitai, na musu Napota ona o lona tofi mai lona tamā – o se faamanuiaga mai lona tama, o sona matupalapala mai lona tamā. Peitai, ua avea le tali a Napota, ma ala ua le fiafia ai le tupu. Ua iloa e Iesepela lana ava, ona ia faia lea o le togafiti e fasiotia ai Napota (f.14).

O le manaotele o Iesepela i le tovine ma le fanua o Napota, na mafua ai ona fai le agasala o le taupulepule i se auala e oti ai Napota. O le iuga o Iesepela na aina e uli e pei ona fetalai mai ai le Atua. (1 Tupu 21: 23)

3. Tanielu ma le lua o Leona – Tanielu 6: 1-24. Ua tofia Tanielu e Tariu le tupu e pule i le malo ona o lona atamai ua sili atu i alii silisili ma alii sili o le nuu. Ona taupulepule lea o ia tagata e saili se auala e fasioti ai Tanielu. Ao Tanielu o lana masani, o le tatalo i le Atua i aso uma, e ui o loo i ai le tulafono a le nuu e faasa ai o soo se tagata ona tatalo pe ole atu i se isi tagata mo soo se mea ae tau lava o Tariu le tupu. O le tulafono lenei, na fautuaina ai e ia tagata leaga ia Tariu ina ia faamaufaailogaina i lana faailoga ona o le ita ia Tanielu. Ua o atu nei tagata manaotele i le pule ua maua atu Tanielu o lo tatalo i le Atua. Ona latou ta'u lea ia Tariu ma faatauanau e lafo Tanielu i le lua o leona e tusa o le tulafono ua faia. Peitai, e lei oti ai Tanielu i le lua o leona. E ala usu atu le tupu ma tagata uma, o loo saogalemu Tanielu ma lana upu: Ua auina mai e le Atua o lana agelu, ua pupuni i gutu o leona. O le iuga

o le tala, na toe faapaleina Tanielu i lana galuega, ae ua lafo uma le alii silisili ma alii sili ma o latou auaiga i le lua o leona ma feoti.

O le manaotele i le tofi e pei ona tofia ai Tanielu, na afua ai ona latou taupulepule ma fai le togafiti ina ia oti Tanielu. O le iuga o le aualii ia, na aina e leona ina ua lafo i ai e Tariu ma ana auauna. (Tanielu 6: 24).

4. *Iuta le Sekara – Mataio 27: 1-10.* O Iuta o le tasi lea o soo o Iesu e pei ona iloa ai i le Tusi Paia. O lana matafaioi poo lona tiute sa i ai, o ia o le teutupe a le auso’o. O le naunau tele o Iuta, i tupe na mafua ai ona ia faatauanau i le au tusi upu ma le au faresaio i se totogi tupe na te faalataina ai le Alii o Iesu. O lea lava na taunuu, peitai, na avea lona naunau i tupe ma ala o lona sese, lea na ia toe iloa mulimuli ane ae ua tuai. O le iuga o Iuta e pei ona iloa ai i le Tusi Paia, na sisi lona ua. E maua atu e tagata ua pala lona tino, ma ua salalau ese ona totoga. O le manaotele i tupe, na tupu ai le agasala e aumai tupe ae faalata i lona matai. O lona iuga o le oti mataga.

Faamanatu: Ua na o Iesu e malie ai o tatou loto i mea lelei uma.

.....

ASO SA: 22 IULAI 2018

MATAUPU: O LE AVEA MA SOO MONI O KERISO – Luka 9: 23-25

O le mataupu o lenei aso tatou te toe faamanatu ai le taua upu ia a Iesu e pei ona faamauina – Luka 9: 23-25. O le

fa'amoemoe o lenei mataupu, ia toe faamanatu le taua o le avea o i tatou ma so'o moni o Keriso.

FAATINOGA O LE MATAUPU:

1. Ia fetufaai ma fa'aali finagalo i le uiga o le fetalaiga a Iesu – Luka 9: 23-25
2. O le a le uiga o le upu satauro, o loo fa'aaogaina e Iesu?
3. Faamatala ni uiga e talafeagai mo i tatou ua filifili e fai ma so'o moni o Keriso.

FESOASOANI:

1. O le a le uiga o ia upu ia ave le satauro ma mulimuli atu ia Iesu?

O le satauro i le vaai a Iutaia, o le faailoga o le oti. O le faailoga ua leai se fa'amoemoe. O le iuga o le faamasinoga o Iesu, o le oti. O le mafaufauga o fitafita, e amo lava e Iesu le satauro e faasatauro ai. O le fetalaiga a Iesu, ua manino ai, e le faigofie le avea ma so'o. O le avea ma soo, o le auunaga e tau lava i le oti. O le vaai ma le matau a tagata faifai o le lalolagi, e leai se aoga o lea galuega o le avea ma soo o Iesu. O lona iuga lava o le oti. O lona finagalo, ia iloa e le tagata, o le mulimuli ia te Ia e le o se mea e faigofie. E mamafa, e inosia, e iu foi i le oti, e pei ona faia ia te Ia e le lalolagi.

O le uiga lea o lona finagalo – o se faasaogalemuina lona ola e maumau ia, ao le e faamaumau lona ola mo Ia e faasaoina. Ua faamanino e Iesu, o le avea ma so'o, o se galuega e le faigofie. O lona iuga e maumau ai le ola. Peitai, o le tagata e filifili e faamaumau lona ola ona o le avea ma so'o, e maua e ia le ola e

faavavau. Ao le tagata e musu e faamaumau lona ola mo Ia, e le faasaoina ia i le ola e faavavau.

O nisi ia o a'oa'oga e mafai ona fesoasoani i ni a'oa'oga e saunoa i ai le Autalavou:

- i) E le tau ina mulimuli le avea ma soo.
- ii) E le o le ala aupito lelei e ui ai le soo.
- iii) E iai sootaga faigata ma faamanuiaga a le Alii

Faamanatu: Ia atagia i a tatou amioga le uiga o le avea o i tatou ma so'o moni o Keriso.

.....

ASO SA: 29 IULAI 2018

MATAUPU: AISEA E MAFUA AI LE PULE I LE OLA?

Ua matauina le faatuputupulaia pea o le Pule i le Ola i totonu o le tatou atunuu. Ae mafuli lava i le aafia ai o tatou le tupulaga talavou. O le mataupu o lenei aso, o le a tatou faasoa i le fesili ua aumai: Aisea e mafua ai le Pule i le Ola?

FAATINOGA O LE MATAUPU:

1. E fautuaina le vaevae i vaega e lua: tama ma teine.
 - a. Faailoa mai e tama ni mafuaaga e manatu e mafua ai lenei mea o le pule i le ola, faapea foi i teine.
 - e. Tapena pea lau susuga e taaofai manatu ina ia maua se tali o le mataupu.

2. Faitau i le tala ua filifilia mai le Tusi Paia ma faaali manatu i ai poo le a le fesootaiga o le fetalaiga lea a le Atua ma le taua o le ola o le tagata.

FESOASOANI:

1. O nisi o manatu taatele o tagata fai mai: o le pule i le ola o se fofo lea o faafitauli o le tagata. O le a se taofi o le Autalavou? Ae a Iesu, o se fofo o faafitauli?
2. Ua manatu nisi o le pule i le ola, o le faailoga o le le lava o le ola faaleagaga, le lava le ola aoaoina o le talavou, le lava le fautuaga a matua, o i e iloa ai le tama/teine le usitai i matua, o nisi e manatu ua ova le onā, ova le ula i fualaau faasaina ma isi lava mafuaaga.
3. I le tusi faitau o Iopu o loo manino ai le fetalaiga a le Atua ia Satani e pule i mea uma ua i a Iopu: (Iopu 1: 12)“Ona fetalai atu lea o le Alii ia Satani, Faauta, ua i lou lima ana mea uma, *tau o ia lava aua e te faaoo i lou lima*. Ona alu ese lea o Satani i luma o le Alii. – O le fasi fuaitau lea o loo faaliliuina ma faauigaina e le au suesue, tau lava o lona ola. Ua tuuina e le Atua ia Satani le pule e tafilisaunoa ai i isi meatotino sa ia Iopu, ae tala o lona ola. O le faailoga lea e iloa ai, e pele le ola i le Atua.
4. O le tusi lona lua: Kenese 2: 7. O le manava ola mai le Atua na ola ai le tagata na faia i le amataga. O lona uiga, o le ola o le mea mai le Atua. E pule ai le Atua.
5. O Iesu o le fomai o fomai. O ia e faamalolo i so’o se mai. O gasegase o le tino, mafaufau ma le agaga, e maloloina uma ia Iesu

Faamanatu: O le ola o le meaalofa a le Atua mo le tagata. E tatau i le tagata ona faaoga tatau le ola.

.....

ASO SA:

5 AOKUSO 2018

MATAUPU:

AGANUU – O LO’U NUU

O le mataupu o lenei aso, o le toe faamanatu i tupulaga talavou, o lo latou faasinomaga. E aofia ai le iloa lelei o faalupega o lona nuu (nuu o le tamā & nuu o le tinā), igoa ipu o alii ma tulafale, igoa taupou, o malae, o tulaga maota ma laoa, ma isi mea taua faapena o loo i totonu o le nuu. E le aofia matagi i se naunau atu o le mataupu. Ao le popolega, ua toatele talavou e manatu mama i mea ia o faalupega, o igoa taupou o lona nuu, o tulaga maota, o igoa ipu a lona nuu ma isi lava measina taua e tatau ona silafia ma iloa mo lona lelei alualu i luma. Aua poo fea lava e aga i ai le tagata, e iu lava i le aiga ma le nuu na ola ma tupu ae ai.

FAATINOGA O LE MATAUPU:

1. Talanoa faatasi le Autalavou ma faamalamalama vaega e pei ona moomia mo le mataupu. O le fa’amoemoe, ia maea ane le mataupu ua manino mea nei mo le silafia e tama ma teine talavou:

- i. Faalupega o le nuu (ma nuu o ona matua)
- ii. O ai suafa matai e aofia i faalupega o le nuu.
- iii. Igoa ipu i taimi o le ‘ava.
- iv. Tulaga maota ma igoa o toga (pe afai o i ai)
- v. Igoa taupou

(Tuu pea le avanoa i le Autalavou, pe i ai nisi mea taua i totonu o le nuu e tatau ona talanoaina ao i ai i lea mataupu).

2. E moomia tele le fesoasoani a le au matutua o loo i ai i le Autalavou e faamanino ma faalatele mea ia mo le silafia e tagata uma.

Manuia le mataupu!!!

ASO SA: 12 AOKUSO 2018 (ASO SA O TAMĀ)

**MATAUPU: O LE ALOFA O TAVITA IA APISALOMA –
2 Samuelu 15:8-23**

O le Aso Sa lenei o tamā i Samoa nei. O se aso tatou te to manatu ai i le sao taua o tama i totonu o aiga, o nuu, Ekalesia ma soo se faalapotopotoga. E tele tala o le Tusi Paia, o loo taua ai tamā lelei ma tama faalelelei. O le tala o lenei aso, o le tala ia Tavita ma Apisaloma.

FAATINOGA O LE MATAUPU:

1. Ia faitau i le tala ua filifilia ma tali i fesili ua tuuina atu.
 - i. O le a sou lagona e uiga i le mea ua aia e Apisaloma?
 - ii. O se faaiuga tataua lea na faia e Tavita le tupu ina ua faalogo i le tala e uiga ia Apisaloma lona atalii, o le sosola lalafi i le vao?
 - iii. O le a sou taofi, pe afai o oe o Tavita, ao lou atalii lea ua fouvale i lau nofoaiga?
 - iv. 2 Samuelu 18: 33, o loo faamauina ai le tali a Tavita i le tala ua oo ane e uiga i le oti o Apisaloma. O le a se a’oa’oga e mafai ona tatou iloa mai lea tali a Tavita – Apisaloma, Apisaloma e, ta fia oti e sui ‘ai oe?
2. Ia mafaufau i le soifuaga lenei o loo tatou i ai. Faamata o iai ni faafitauli faapea: o le fouvalega i totonu o aiga, o nuu,

Ekalesia poo le atunuu. Fa'aali manatu ma ia manino le talanoaga.

3. Mo i tatou le tupulaga talavou, o le a se a'oa'oga ua tatou maua mai lenei tala ia Tavita ma lona atalii?

FESOASOANI:

- i. Pe afai tatou te faitau le tala lenei mai le vaaiga faa Samoa, o le matuā le tonu ma le sa'o le mea ua fai e Apisaloma. Ua leai se fa'aaloalo o fanau i matua. Ua leai se ava fatafata o fanau i matua. Ua fesiligia le aoaiga a Tavita mo lona atalii. O loo fesiligia foi le ola usiusitai o Apisaloma i lona tamā.
- ii. Pe afai tatou te faatusatusa i tulafono o le Tusi Paia, o le mea lava e tasi, ua leai se ava o fanau i matua e pei ona poloai le tulafono e lima.
- iii. Peitai, a tatou faatauina gaiouga ma faaiuga a Tavita, o iina o loo taoto ai le feau o lenei aso. O le tamā e alofa faamaoni. Ai lava ua solasola Tavita i lona lagona, o Apisaloma o le tagata e faigata ona uiga. Tuu pea ia atonu e iloa lona sese. Peitai ua pogisa lava le vaai a Apisaloma i le alofa o lona tamā. E tiga lava ona faia e lona tama mea lelei ma fai faailoga o lona alofa, e lei iloa lava, ona ua malo le manao tele i lona loto.
- iv. E lei fiafia tagata uma ia Apisaloma. O le oo ane o le tala ua oti Apisaloma, na manatu tagata uma ai o le a fiafia Tavita ina ua oti Apisaloma. Peitai, ua le faapena le lagona o le tupu – 2 Samuelu 18: 33.

Upu Faaiu: “Ia ava i lou tamā ma lou tinā, e faalevaleva ai ou aso i le nuu o le a foaiina mai e le Alii le Atua ia te oe”

Manuia le mataupu.....

ASO SA: 19 AOKUSO 2018

**MATAUPU: O FOLAFOLAGA IA APERA'AMO
- Kenese 12: 2 – 3.**

“Ou te faia oe ma nu’u tele, ou te fa’amanuia fo’i ia te ‘oe”

“Ou te matuā fa’amamaluina lou igoa, e manuia fo’i ‘oe”

“Ou te fa’amanuia atu ia te i latou o e fa’amanuia ia te ‘oe, ou te fa’amalaia atu fo’i ia te i latou o e fetu’u ia te ‘oe”

E manuia fo’i ia te oe aiga uma o le lalolagi”

Tatou asiasi i mea ua mafai ona fa’amaonia, aua o ala lava ia e mafai ai ona talitonuina ai tala ua tu’uina mai ma ua tatou faitau ai.

O le tusi o Kenese na fa’ato’a maua i le va o le 200 – 100 tausaga (TLM), ina ua maua tusitusiga i le sami mate (Dead Sea Scroll). A o le tala ia Apera’amo, ua fuafuaina e le ‘au sa’ili’ili pe tusa o le fa’afe (4000) tausaga le matua o le tala lea. O lona uiga, na fa’ato’a fa’amauina lenei tala i se taimi mulimuli mamao ane lava. E le gata i lea, ae e le to’atele ni tagata Iutaia (Jews) sa latou tausia le Tusi o le Feagaiga Tuai (Torah) ina ua tusia. O le mea moni (fact) lenei ua mafua ai ona to’atele tagata e tu’u fesili pe moni ‘ea sa i ai le Atua, pe sa talanoa ma Apera’amo, ma faia ia folafolaga ua tatou taofi iai. Afai fo’i tatou te iloa lenei tala, e le taumate o le a tu’u fesili fo’i nisi o tatou pe fa’amaonia ‘ea nei tala ua tatou maua mai i le Kenese pe leai.

Pe tusa o le fa’afe (4000) tausaga (TLM), sa amata ai le malaga maumau solo a le tamaloa Kaletaia; e lē se tagata taua i le a’ai

o Uro, e leai fo'i se mea na ia faia e tatau ai ona avea o ia ma tagata taua. Na te le'i ta'ita'ia se 'au tau, ma fa'amauina ni ona manumalo maoa'e e pei o Hanipale po o Alesana le sili; na te le'i pulea se malo e pei o Farao sa fa'atuina piramita a Aikupito; na te le'i tusia se tusi maoa'e pe fau se mea e pei o Henry Ford sa faia le ta'avale afi, poo se isi lava mea e tatau ai ona manatua lona igoa. Pau lava le tala ua tatou maua, sa ia fanaua se fanau e to'a valu, o fanau ia sa tutupu mai ai atunu'u, ma nai ona fale 'ie e fa'atutū solo i mea e aumau ai. O le uiga lea o mea i le tala fa'asolo o le lalolagi, "O mea e tutupu ma mea e mafua ai" (cause and effect) e tatau ona fa'amalieina ina ia mafai ona amana'ia, ma fa'aalologia ai se tasi. O le tala ia Aperamo, ua faia'ina uma ai lenei malamalamaga o le lalolagi, aua e leai lava se mea ua fa'amauina e tatau ona avea ai o ia ma tagata aloa'ia ma ta'uta'ua.

O le mea ua mautinoa, o tagata ta'uta'ua uma lava i le lalolagi, e tula'i mai i vaega 'ese'ese ma a latou taumafaiga iloga, e galo. Ua galo Hanipale, ua galo Alesana le sili, ua galo le Farao o Aikupito sa fausia ma fa'atutū piramita. Peita'i e lē galo le tamā lenei o Aperamo; le tagata na toetoe lava a lē maua se fanau, a ua avea lava lenei suafa ma igoa e tautalatala iai le tele o aiga o le lalolagi e o'o mai lava i ona po nei.

Na fa'apefea ona ta'uta'ua le igoa o Aperamo?

O le tausaga e 1975 – 6, sa maua ai ni tusitusiga anamua ile itu i matu o Suria; e 17000 papa ma'a ua fa'aigoaina o Ebla tablets. O sa'iliga o le atamai na fa'amaonia ai pe tusa ua 4,200 tausaga le matua o nei tusitusiga. O nei tusitusiga, o lo'o ta'ua ai igoa nei o Sotoma, Komoro, Atama, Sepoima, ma Soara; o igoa ia o 'a'ai o le fanua laugatasi e lata ane ile mea sa mau ai Aperamo. O le mea e mata'ina, o le tutusa lelei o le

fa'aaogaina o nei igoa i le Ebla tablets ma le molimau o lo'o fa'amauina ile Kenese 14: 2.

O nu'u sa tutupu mai ia Aperamo, sa avea e fai ma nu'u ta'uta'ua, ma sa tutupu mai ai tagata ta'uta'ua. O le uiga moni lava lea o le folafolaga, "Ou te faia 'oe ma nu'u tele...Ou te fa'amamaluina lou igoa...".

Talanoaga

1. Ua tu'uina atu i luga mafua'aga e lua na ta'uta'ua ai Aperamo ia togafiti ai ni fesili e pei ona ta'ua muamua (*Pe fa'amaonia nei tala pe leai*). A ua tatau nei ona tatou va'ai i le tala leni e pei ona tatau i le 'au fa'atuatua.

2. O le a so tatou taofi, pe aisea ua matua lauiloa ai ma ta'uta'ua leni tamaloa mai Uro i Kaletaia?

3. O lo'o pupula malosi mai i folafolaga nei le upu: "OU TE FAIA..." O lona uiga, ua ta'uta'ua ona o le mana o lē sa fai mai ma tu'uina ifo nei folafolaga. Le suafa lea o le Atua sa fa'a'iloa ia Mose..."O a'u..."

4. E le'i faia'ina pe to'ilalo Aperamo i le usita'i atu i lē sa tu'uina ifo nei folafolaga, e ui ina matua faigata le ala sa ia savalia, ae sa tumau pea lona talitonu i le fa'amaoni o lē sa folafolaina mai.

5. O lo'o finau le lalolagi po o ai e sili i le poto, malosi, tamaoa'iga, ma le tele lava o mea ua tatou va'ai ma fa'alogo iai. O le sini 'autū lava lea o mea uma, po o ta'aloga, aoga, galuega, aiga, so'o se mea. Ua finafinau lava ina ia maua le sili po o le mana (power) ina ia maualuga i manatu o tagata. O le lalolagi fo'i lea sa feagai ma le taumafai mai o Aperamo.

6. O ga fea o le ta'aviliga leni o lo'o tutū ai tatou? O le itu a le lalolagi po o le itu a Aperamo?

7. O le a so tatou manatu, e fa’apefea ona a’afia tatou ile folafolaga sa tu’uina ifo ia Aperamo’amo?

Pese Faaiu: Aperamo le tama ma lana fanau,... o au le isi o oe le isi...Father Abraham had many sons...I am one of them and so are you...

.....

ASO SA: 26 AOKUSO 2018

MATAUPU: AGANUU – O LE ‘AVA

E tauilo ua nofo silafia le taua o lenei aganuu faasamoa poo le feiloaiga i le ava. Pe a taunuu ni malo, o le ava lava e muai faafeiloai ma faatalofa ai. O le mataupu o lenei aso, o se toe fafagu lea ma toe faamanatu le taua o lenei aganuu faa-Samoa.

FAATINOGA O LE MATAUPU:

- 1. O le a tuu atu pea le faitalia i lau susuga i le taitai mo le faataunuaina o lenei mataupu. Pe fai se faatinoga puupuu, tau ina faaata le saofaiga i taimi o le ava, ma ia toe faamanatu i tupulaga talavou le taua o lenei aganuu faasamoa.
- 2. Manatu o se laolao lelei foi lea e toe faamanatu ai igoa ipu a matai o le nuu e pei ona taua i le mataupu muamua.
- 3. O nisi nei o mataupu e fia fesoasoani i ai le mataupu i lona faatalanoaga:

a. *O le vai ava*

O le vai ava, o le faasologa ia sao o tagata e feinu i le ava. ‘Aua e le o tagata uma e i totonu o le maota po o le laoa e tatau ona feinu, so o se tauaofaiga a se nuu e fai a o iai le faifeau, o le ava mua lava lena.

MATAUPU: AMIOTONU MA TAULAGA

O le uiga o le upu Amiotonu, o le amio ua lelei, ma ua sa’o e tusa ma le sisila mai o fofoga o le Atua. O Taulaga, o mea ua ofoina atu mo le Atua. O le a aga’i tonu loa le mata’upu i le amiotonu ma taulaga e pei ona o lo’o tautala iai Afioga a le Atua/Tusi Pa’ia.

FAATINOGA O LE MATAUPU:

1. E fautuaina le fai mataupu, ina ia fai ni kopi o faamatalaga e pei ona folasia atu mo le fetufaa’iga a le Autalavou.
2. A maea ona faatalanoa le pepa o faamatalaga, ona fesiligia lea o le Autalavou i fesili nei mo le faalauteleina o le mataupu:
O a aganu’u a Samoa o loo fa’atinoina ai le soifua fai taulaga o le EFKS?
 - i. Pe mafai ona tatou fa’a feso’ota’i a tatou aganu’u ma le agaga o lo’o fai ai a tatou foa’i?
 - ii. O le a sa tatou tali atu i le anoano o faitioga o lo’o tu’ua’ia a le EFKS ma ana foa’i?

FESOASOANI:

O le amiotonu ma le soifua fai taulaga, o nisi ia o tula o le soifua tapua’i o tagata Iutaia, e fuifui lua, e le mafai ona tu’u ‘ese’eseina. E le atoa le soifua tapua’i pe afai e misi ai le amiotonu atoa ma le soifua fai taulaga.

Sa fa’apefea ona tupu ae lenei mea O LE FAITAULAGA, a o anafea fo’i sa amata mai ai?

Tatou te va’ava’ai lava i le tala fa’asolopito o le nu’u o le Atua (Isara’elu), o tagata ia sa fa’aali mai ai le finagalo o le Atua mo tagata uma.

I le amataga, sa fai taulaga le fanau a Atamu, ma sa foa'i a la'ua mea sa maua e avatu mo le Atua. A o avea Isara'elu ma nu'u maumau solo, o nai o latou fale 'ie ma nai a latou lafu e feta'ia'i solo i le vao, o lo latou soifuaga atoa lea. Sa mafuli ina tutusa tagata uma ma aiga uma i le itu tau i le tamaoa'iga. E le'i mamafa lava i nā aso se mana'o ina ia fai ni foa'i mo nisi tagata. O nai a latou manu lava mai a latou lafu, ma nai fua o le fanua, na o le pau ia o mea sa foa'i e fai ai a latou taulaga.

Peita'i ina ua latou umia fanua, ma ua tuputupu pulega fa'a nu'u ma itu malo ma malo sa ogatotonu iai le pulega o tagata, ona iai loa lea o suiga. O se tasi o suiga iloga sa matuā a'afia ai tagata o le nu'u o le Atua, o le fa'a tuputupu la'ia lea o le numera o nai fai fa'ato'aga i nofoaga e taumamao ma taulaga, sa matuā faigata la latou tauiviga ina ia maua le soifua lelei, ma o'o atu lava ina lē mafai ona totogi a latou aitalafu. Sa i'u ina goto ifo i tulaga maualalo sa faigata tele ai le ola. A o taimi fo'i lava ia ua fa'a tuputupu la'ia ai fo'i ma le oloa o le 'au mau mea to'a ititi o e sa nonofo i taulaga. Ua fanau mai ai loa ma fa'apopotoga o tagata po o sosaiete ua iloga lelei ai le matuā āfāina o le amiotonu mo tagata uma (social justice) e pei o le a'ano o le feagaiga ma le Atua. O le leaga lenei sa matuā 'ava'avau ai perofeta e amata mai ia Amosa ma ta'u atu i tagata ina ia liliu ese mai le leaga, a ia fai le lelei; ia tafe ifo le fa'amasinoga e pei o vai, ma le amiotonu e pei o vai e tafe tele lava (Amosa 5: 24).

O le mafua'aga lea o le agaga foa'i i le Feagaiga tuai; sa faia lava ona o le manatu alofa i tagata matitiva, ia toe fa'a leleia; sa maualuga le talitonuga, o le amiotonu lava lenei, ina ua soifua tutusa tagata uma. Ia foa'i mea alofa mo lē ua leaga ina ia toe lelei o ia. E fa'apei ona galue mai le Atua mo tagata uma

i lana amiotonu, o loo manuia ai tagata uma, e tatau ai fo'i ia i latou uma o e tapua'i ia te Ia ona faia le amiotonu mo isi.

Afai e te ave le ofu tele i le tagata ua ole mai, o le a mafai ona maua e ia se moe mafanafana i le po, o le amiotonu lava lea e tusa ma le silafaga a le Atua.

Tapua'iga i nofoaga fai tele (public worship) o le aganu'u a Iutaia

E tolu itu aso taua sa fa'ailogaina e tapua'i ai tagata Iutaia i le Atua, o la latou aganu'u lea (*cultural practice*). O le taeao i le oso a'e o le la, o le aoauli pe tusa o le itula e tolu, ma le afiafi. O le taeao ma le afiafi e mafuli ina tapua'i ai le aiga i o latou fale. A o le aoauli, sa fa'atinoaina ai tapua'iga i nofoaga fai tele. A o'o i le taimi o nei tapua'iga, e fa'ailo i le ili o pu, ina ia taofi galuega a tagata o lo'o fai ae fa'a avanoa lona taimi e mafuta ai i le Atua. O tapua'iga fo'i nei sa na ao ai foa'i mo tagata matitiva. O tagata o lo'o fai a latou fefa'ataua'iga i le maketi, ma e o lo'o fa'atau, latou te taofi mea uma 'ae tapua'i i le Atua, atoa fo'i ma le ofoina atu o mea alofa po o taulaga.

O le Mataio e 6 fuai'upu 1 e oo i le 4 o lo'o lavea mai ai le aganu'u lenei a tagata Iutaia i le lauga a Iesu. E leai lava se upu o le lauga a Iesu e fa'alēaogaina ai le faia o tapua'iga i nofoaga fai tele po o le aganu'u lenei a Iutaia, vagana ai lona a'oa'o mai ina ia liliu 'ese mai le fa'aaoga sesē o le agaga sa fai ai tapua'iga atoa fo'i ma foa'i.

Fa'afitauli sa alia'e mai i tapua'iga fai tele (public worship)

Sa o'o ina fa'aaoga e le 'au Faresaio ma Tusi'upu, fa'apea fo'i le 'au mau oloa tapua'iga nei e sa'ili ai o latou vi'iga. Sa fai a

latou taulaga i ni auala e vi'ia ai latou e tagata. Sa avea fo'i taulaga e fai ma fua o le ola fa'a le Agaga. A tele lava lau foa'i, o lona uiga e tele fo'i lou ola fa'a le Agaga. Ua fai lava ma tauvaga po o ai e aupito telē lona ola fa'a le Agaga. O le tagata e sili, e muli'auloa ai le to'atele. A foa'i se mea alofa e le lima taumatau, ona fa'alooa lea pe lialia'i le lima tauagavale ina ia iloa mai ai e tagata ua ia foa'i se mea alofa mo se tagata mativa. O le mafua'aga lea na a'oa'o mai ai Iesu i lana lauga, ma ua ia tu'u mai ai se fa'aa'oa'o i mea e tatau ona tatou 'alo 'ese ai.

Amiotonu ma Taulaga i le EFKS

E fuifui lua lava le fa'atinoga o le tapua'iga o lo'o faia e le EFKS ma aganu'u a Samoa. O le amiotonu lava lea sa fa'atino ai tapua'iga a Iutaia, lea fo'i ua tatou fa'aa'oa'o iai. O le manatu laualalo o lo'o atagia mai e fa'amatalaina e fa'apea; e aupito to'a malie (comfortable) lava le tagata i lana aganu'u auā ua masani ai. O aganu'u fo'i, o nisi lava ia o va'aiga i le foafoaga a le Atua; e fausia ina ia maua e tagata le soifua lelei. Ae le gata i lea, ia maua fo'i e tagata le so'otaga mafanafana ma lona Atua i le to'a malie ma le filemu ua mafanafana ai.

O le soifua fai taulaga o le E.F.K.S., o le isi lea fa'atinoga o lo tatou fa'aaloalo i le Amiotonu a le Atua o lo'o tu matila i le feagaiga a le Atua ma tagata; ma o lo'o faia lava e tagata lotu e tusa ma aganu'u a Samoa. O le agaga lava fo'i sa taula iai o fetalaiaga lava a Iesu: "Alofa i le Atua, alofa i lē lua te tua'oi".

.....

**MATAUPU: AISEA UA TEPA AI I TUA LE AVĀ
A LOTA? - Kenese 19: 12-29**

Atonu o le a eseese ni manatu faaalua e tusa o le fesili ua fai ma mataupu. Peitai, e faasino tonu le tatou mataupu i manatu o nisi fai mai: *o le tuinanau i fiafiaga i Sotoma ma Komoro na mafua ai ona tepa i tua le ava a Lota.* Peitai, e leai ni upu faapea o tusia i le Tusi Paia. Ae ua na o ni mafauauga ua faauiga ai e tagata, e fua i le tala ua aumai. I le manatu o le mataupu, o le liu tupua masima, ua na o se faasalaga ua oo ane i le fafine, ona ua ia le usitaia le faatonuga e **aua nei tepa i tua.** E tusa lava poo le a le mafuaaga e tepa ai i tua, o le faatonuga – ‘aua’. O le ‘aua’ a le Atua, o lona uiga, e faasala oe pe a e le usitai i ai.

O le fa’amoemoe o lenei mataupu, ia tatou toe faitau ma sailiili pe i ai nisi mafuaaga na tepa ai i tua le ava a Lota, e ese mai le manatu lea ua atou iloa: o le tuinanau i mea faafiafia o le olaga.

FAATINOGA O LE MATAUPU:

1. Vaelua le Autalavou i vaega e lua: tama ma teine.
2. Fetufaai vaega e lua i fesili nei e faatatau i le tala:
 - a. Aisea na tepa ai i tua le ava a Lota?
 - e. O gafea o le Tusi Paia, o tusia ai le ola tuinanau o le ava a Lota?
 - i. O ai lea e fai i ai le faatonuga a le agelu: f.17.
 - o. E fesootai le liu tupua masima o le ava a Lota ma le feau momoli a Iesu e uiga i le lelei o le masima?

FESOASOANI:

O nisi nei o mafuaaga e mafai ona tatou manatunatu i ai e ui e le o taua mai i le Tusi Paia.

1. *E le iloa e le ava a Lota le faatonuga a le agelu lea na faia ia Lota.*

O loo manino lava i le faataotoga o le tala, o Lota lava lea e talanoa ma le agelu. O le itu foi lea, e manatu ai le mataupu, na o Lota lea e fai i ai le faatonuga: “...ina sola ia e te ola ai, aua e te tepa i tua...” E moni lava o lea na taitaiina uma mai i latou e le agelu i tuapa, peitai, o lea lava e segila (singular) le faatonuga o loo faia: ina sola ia **e te** ola ai, aua **e te** tepa i tua. O le tasi lea o mafuaaga e mafai ona tatou faapea ai, na tepa i tua le ava na Lota ona o le lē iloa po o le lē malamalama i se faatonuga a le agelu e aua nei tepa i tua.

2. *Na tepa i tua le ava a Lota ona o le manumanu ma le misialofa i ana atinae na faia mo lona aiga.*

E taunuu atu le feau ia Lota ma lona aiga ua mautu lo latou aiga i lona atinaeina i le mea lea e nonofo ai. Pau le faafitauli sa i ai o uiga mataga o tagata e pei ona tatou faitauina. E le taumate foi o le mafuaaga lea na faatuai ai Lota i lona tulai ese e tusa o le faatonuga e pei ona taua i le fuaiupu e 16: “*Ua faatuatuai o ia...*”. O le faatuai o Lota e afua mai i lona manumanu i ana atinae ua mautu mo lona aiga. O le itu foi lea e manatu ai le mataupu, o le tepa i tua o le ava a Lota, e le o le tuinanau i uiga mataga ma faiga faapaupau ao le tepa a le tagata galue, e manatua ai lona tigaina i ana atinae ma mea na faia mo lona aiga.

3. *Ua tepa i tua le ava a Lota, ona o le alofa.*

(1). Ua tepa i tua le ava a Lota ona o le alofa i ana uo, o tagata matutua o lona nuu ma fanau a lona nuu. Aua o ai se tinā e le lagona le alofa pe afai ua faalogo atu i le uio ma le fetagisi mai o tagata ona o le afi ua oo atu ia te i latou? O ai foi le tagata e

sola pea e aunoa ma se alofa pe afai e faalogo atu o loo fetagisi tagata ma fia feola ona o le afi? Atonu sa le tatau lava ona tepa i tua le ava a Lota, peitai o lagona ia faatinā alofa, poo le a lava le tuga o se mea ua fai, e le mafai lava ona muta ai le alofa faatinā.

(2) Ua tepa i tua ona o le alofa i lana fanau. O loo i ai foi le talitonuga e faapea, o le solaaga a Lota ma aiga, na taitai e Lota, sosoo atu ai ma lona ava, ae pito i tua lana fanau. O le tepa la i tua o le ava a Lota, o le tepa a le tinā alofa, e faamautinoa o loo saogalemu lona aiga. Atonu lava sa manatua le faatonuga, ae ua le sili ae le faatonuga i le alofa i lana fanau poo a mai i le latou solaaga ua faia nei.

O loo taua e Iesu le mea lea na tupu i le ava a Lota i lana lauga Luka 17:28-32, e faatatau i le aso e oo mai ai le toasa o le Alii poo le aso o le Alii. Pe afai e oo mai lea aso, e leai ma se tagata e mafai ona ia tu ma tetee atu. Fuaiupu 32 o loo fetalai ai Iesu: Ia outou manatua le ava a Lota. O loo molimau nisi o le au suesue o le Tusi Paia, o loo faatatau upu a Iesu, i le leaga o le le usitai. O le faatonuga, aua le tepa i tua. Peitai na tepa i tua le ava a Lota. E oo foi i lenei tala, e le o taua lava se mafuaaga na tepa ai i tua le ava a Lota.

Peitai, o lea ua tatou iloa ma a'oa'oina mai lenei tala, a fetalai loa le Atua e aua, o lona uiga e tatau ona tatou faautauta ma usitaia. Aua le fa'aalia i ai so tatou poto, ma faapea ane, e sa'o le mea lea o le a ou faia.

Faamanatu: Ia tatou faalogo ma usitai i le Atua, ae tuu lo tatou iloa e fai mulimuli.

.....

ASO SA: 16 SETEMA 2018

MATAUPU: UA SOLA IONA I TASESA

TUSI FAITAU: Iona 1: 1-3

O le tasi lenei o tala iloga o le Feagaiga Tuai, tala ia Iona. Peitai, o loo iloa Iona i lona le usitaia i le faatonuga a le Atua e alu i Nineva e talai atu lona finagalo. O le tala, na sola Iona i Tasesa ae tuu Nineva e pei ona poloai i ai le Atua. O le fesili e fiatulituli e le tatou mataupu, o le mafuaaga na sola ai Iona. I le talitonuga, na iloa lelei e Iona, e le mafai ona sola i luma o le Atua. Lea lava na iloa i lana tautinoga, ina ua fesiligia e le auvaa lona Atua ma lona talitonuga – f. 9. O lona uiga e i ai mafuaaga na afua ai ona sola Iona i Tasesa. .

FAATINOGA O LE MATAUPU:

1. Tuu pea le avanoa i le Autalavou e fa'aali ai ni manatu: Pe aisea ua sola ai Iona ae le faia le faatonuga mai le Atua?
2. Saili ni a'oa'oga e fesootai ma le olaga faa Autalavou o tatou i ai nei.

FESOASOANI:

O nisi nei o mafuaaga o loo faamauina i suesuega e faatatau i lenei mataupu:

1. Ua fefe Iona i aafia lona olaga i faiga sau a tagata o Nineva
O loo taua i le Nauma 3: 1-4 (faitau e le Autalavou) uiga ma faiga mataga e pei ona poloai ai le Atua ia Iona – tau atu ia

Nineva ua oo mai a latou agasala i ou luma. O loo molimauina, o le tasi lea mafuaaga o le le alu o Iona, o le fefe i uiga saua o tagata.

2. E musu Iona e faaola tagata Nineva.

O Nineva, o le aai o Asuria, le nuu na faapologaina tagata Isaraelu. O le vaaiga faaletagata e pei ona mafaufau Iona, e tatau le sasa ia Nineva sei tau atu lo latou saua i tagata Isaraelu.

3. O le faaolataga e mo tagata Isaraelu lava.

O le manatu o Iona, o le Atua, ua na o Isaraelu lava. E leai se mea o le a faaolaina ai fua tagata Nineva, aua o tagata o nuu ese. O tagata saua ma le fiafia e fai le agasala.

Nisi o A'oa'oga mai le tala:

1. O i tatou o ave feau e pei o Iona. O lo tatou tiute o le faalogo ma usitai i le faatonuga ae aua le faia o tatou loto.

2. E tutusa tagata uma i le alofa o le Atua. Na manatu Iona, o Nineva o le aai o Asuria e tatau ona faasalaina. Peitai, o le finagalo o le Atua, ia faasalaina na o le tagata e le iloa ona salamo ma foi atu ia te Ia.

3. E le faatuaomia le alofa o le Atua. O le Atua mo tagata uma e aofia ai Nineva, ae le na o Isaraelu e pei ona manatu Iona.

4. E leai se isi e mafai ona sola ese mai fofoga o le Atua. E le'i tuulafoaiina e le Atua Iona, e ui i lona faalogogata ae saili lava le Atua i ni auala ua ia saunia ina ia lavea'iina lana auauna.

Faamanatu: Tuu o tatou loto ae fai le finagalo le Atua.

.....

ASO SA: 23 SETEMA 2018

MATAUPU: O LE FAAIPOIPOGA I KANA I KALILAIA

TUSI FAITAU: Ioane 2: 1-11

O le tala i le faaipoipoga i Kana i Kalilaia, o loo molimau nisi o le vavega muamua lea na faia e Iesu e tusa o le molimau a Ioane.

E masani foi ona fa'aaogaina e le failotu le tala lenei e fai ma molimau o le talia fiafia e Iesu o ia mea o faaipoipoga. Ma e tele foi a'oa'oga taua e maua ai. O le mataupu o lenei aso, o le tatou tuli matai lea o nisi o vaaiga o loo iloa ai le faatauaina e Iesu o e matitiva ma i latou uma e tusieseaa i le sosaiete faalutaia e pei ona taua i le tala.

FAATINOGA O LE MATAUPU:

O fesili e amata ai le mataupu:

1. O le a sou taofi, o ai e masani ona valaaulia i mea nei o faaipoipoga? E masani ona valaaulia ni tagata le taualoa – tagata matitiva ma isi?
2. O ai e serve/auauna e tufa meaa i ma kuka meaa i o aso faapitoa faapenei i le tu ma le aganuu faalutaia?
3. O le a le taimi na fai ai e Iesu le vavega - taimi o le faaipoipoga poo le taimi ua uma le faaipoipoga?

4. Aisea ua ita ai le pule o le tausamaaga – f.9-10?

5. O le a le a’oa’oga a Iesu o loo faapupula mai e lenei tala?

FESOASOANI:

1. O ai e tatau i ai le valaaulia?

I le aganuu faaIutaia, o tagata taualoa lava e tatau i ai le valaaulia i aso faapitoa faapenei. O lea foi e atagia i le tatou atunuu ma aso faapitoa, e valaauina lava i latou e tatau i ai le valaaulia. E i ai le talitonuga o le faaipoipoga lea e fai (e le iloa poo ai e ana le faaipoipoga), o loo faatumulia i tagata maualuluga ma tagata taualoa o le sosaiete o tagata Iutaia. O tupu, o alii sili ma i latou e tata i ai le valaaulia.

2. O ai tagata o loo serve i le faaipoipoga?

O i latou o loo serve/auauna i le tausamaaga, o auauna poo tagata le taualoa. E ese mai i le tatou aganuu, e serve lava tatou e ana le faaipoipoga poo se aso fanau. E leai ni tatou auauna, e moni foi e i ai tagata faigaluega, ae le tutusa lona faamatalaina ma le upu auauna i le aganuu faaIutaia. O le auauna i le vaai faaIutaia, o tagata e leai so latou saolotoga. E leai se avanoa e fa’aalia ai ni o latou manatu, pe tuuina atu ai se latou fautuaga i le matai. O le latou tiute o le faataunuu o galuega uma e manatu i ai le matai. O ia tagata e aofia ai i latou e matitiva, o tagata o fafine ua leai ni taitoalua, o fanau ua matua oti, ma isi tagata e le taualoa ma maualalo o latou tulaga i le sosaiete o tagata Iutaia.

3. O le a le taimi na uma ai le uaina?

E manatu le tatou mataupu, o le taimi ua uma le tausamaaga. A sauni ni aiga tetele faapenei i le aganuu faaIutaia, e le faataga tapenaina. E matua tapena i le mautinoa o le pule o le tausamaaga ua lava ma totoe mea uma. E fua foi le tapenaga i tagata ua uma ona valaaulia. (Lea ua faia e nisi o aiga tetele i le

tatou atunuu, e le mafai na e ulufale e aunoa ma le tusi valaaulia). O lona uiga, e leai lava se avanoa e fesiligia ai le lava poo le le lava o meaai, vaiinu ma mea uma. O le fuafuaga foi o ia mea uma, e tapena lava ia uma ma fetauti mo na o le au valaaulia, e le faatauina ai le au serve. Aemaise o le aganuu faalutaia, o mea e totoe, o mea na e pule ai le auauna poo le leai foi.

E i ai le talitonuga, na uma le uaina ua taufaaiuiu le faaiipoipoga, ona logo lea o Iesu. Peitai, o lana talai: *e lei oo i lo'u taimi*. O le fesili o le a le taimi o Iesu lea e talanoa ai. O le manatu o le au suesue o le Tusi Paia, o le taimi o Iesu, o le taimi mo tagata matitiva ma tagata le taualoa. O le aiga ma le valaaulia o le taimi mo tagata taualoa. Ao le aiga ma le valaaulia a Iesu, e mo tagata uma, e aofia ai ma auauan, e talisua ma aai faatasi.

4. O le a le taimi na tupu ai le vaveg? Aisea ua ita ai le pule o le tausamaaga?

O le vavega la a Iesu, na tupu ina ua uma le faaiipoipoga. O le mafuaaga lea o le ita o le pule o le tausamaaga ma lana upu: “E muamua ona au mai e tagata uma o le uaina lelei, pe a tele foi le inu i ai o tagata ona au mai ai lea o le uaina leaga, a ua tuu e oe le uaina lelei, ua oo mai i lenei itu aso.” Ua manatu le pule o le tausamaaga, e tatau ona muamua mai le uaina lelei mo tagata valaaulia – tagata taualoa, ae mulimuli mai le uaina leaga mo i latou e le taulia.

Peitai, o le taimi lea o Iesu, e pei ona ia folafola. O le taimi mo tagata le taualoa. Ai lava ua taape tagata uma, tagata mauualuluga e tatau i ai le uaina lelei, peitai, ua aumai le uaina lelei ua toe o tagata na serve ma auauna i le tausamaaga.

Faamanatu: E tutusa tagata uma i le Atua.

.....

ASO SA: 30 SETEMA 2018

MATAUPU: AISEA E TOASĀ AI LE ATUA I LE TAGATA?

O loo i ai lava molimau mai le Tusi Pa’ia o loo fa’amatalaina le to’asā o le Atua. O le fa’amoemoe la o la tatou sa’iliga, ia va’ava’ai toto’a i mea ua fa’amatalaina o le to’asā o le Atua po o le a se fe’au o loo aumai i ia tala mo tatou.

O nai fesili ia tatou te sa’ilia se tali:

1. O le a lenei mea ua ta’ua o le to’asā o le Atua?
2. Aisea e toasa ai le Atua i le tagata?
3. Se mea tataui i le Atua ona toasa?
4. O a ni a’oa’oga ma ni mea taua mo i tatou?

O nisi nei o tusi mai le Tusi Pa’ia tatou te sa’ili’ili iai.

	Tusi faitau	Fa’amatalaga
1	Salamo 7: 11	E fa’aalia e le Atua lona to’asā i aso uma aua o ia o le Atua amiotonu
2	Esoto 36: 6; Salamo 103: 8,9	E aga lelei le Atua; e le faigofie ona to’atama’i lona finagalo.
3	Salamo 95	E mafai fo’i ona fa’aaogaina e le Atua

	10, 11	mea e tutupu ile tala fa'asolopito (historical events) e fa'aalia ai lona to'asā.
4	Auega. 2: 21, 22	Sa fa'aaoga e le Atua le tafeaga i Papelonia e fa'ailoa mai ai lona to'asā
5	Sefana'ia 1:14 18	O le fa'a atoaga o lona to'asā o le a fa'aalia ile i'uga o tausaga, o le a fa'amasinoina ai i latou uma o e fai amio leaga.
6	Mataio 3:7	Sa tala'i Ioane le papatiso ma fa'ailoa i tagata, o le afio mai o Iesu o le a ia fa'ataunu'uina ai le to'asā o le Atua
7	Fa'aaliga 6: 15 17	O le to'asā e lē ma 'alofia i le aso e toe afio mai ai Iesu
8	Ioane 3: 36. Efeso. 2:3 Roma 2: 5, 9: 22	O le ola agasala pea o tagata, o le saga fa'afaupu'e ai lava lea o le to'asā o le Atua i o latou luga.
9	Rom 3:25, 5:9, 1 john 2:2, & 4:10	O le alofa o le Atua na ia auina mai ai lona alo o Iesu, na te liua lona to'asā ina ua ia faia le taulaga mo le leleiga.

O le fesili lava lenei e tu'u fesili ai le lalolagi,” Pe mata e tatau i se Atua e atoatoa (perfect God) ona ‘ele’ele i le lenei vaivaiga o le ita po’o le to’asā?” O le fesili lenei ua leva ona fai iai sa’ili’iliga a le ‘au su’esu’e i mata’upu tau le Atua (theologians) ma taumafai e lalaga mai se tali mai mea ua tusia mai i le Tusi Pa’ia.

O nisi sa latou tusia o latou manatu e fa'apea; "O le Atua e atoatoa, ma e le o'o lava ia te ia lenei mea o le ita po'o le to'asā".

A o isi latou te fai mai, "O le to'asā o le Atua ua na o se fa'ailoilo ina ia iloa e le tagata, e iai 'au lape o le mea nei o le agasala".

A o le a so tatou taofi? O talafeagai 'ea nei manatu, ma a'oa'oga o lo'o maua mai le Tusi Pa'ia?

Faamanatu: E toasa le Atua ona o ua tatou le faia lona finagalo.

.....

ASO SA: 28 OKETOPA 2018

MATAUPU: "O A'U NEI"

I le tusi a le Evagelia o Ioane, e fitu fetalaiga a Iesu o loo amata i le – O A'U NEI ("I am" sayings). O le fa'amoemoe o lenei mataupu, ia tatou sailiili i nei fetalaiga a Iesu, ma fefaasoai i ona uiga.

FAATINOGA O LE MATAUPU:

1. Vaevae le Autalavou i vaega e fitu (7). Tofu le vaega ma le tala e faitau, ona toe faamaopoopo lea pe a uma le 15 minute e faasoa faatasi le uiga o ia saunoaga a Iesu.

O tusi nei mo le sailiiliga a vaega taitasi:

- i. O a'u nei le areto o le ola...Ioane 6: 35
- ii. O a'u nei o le malamalama...Ioane 8:12
- iii. O a'u nei o le faitotoa.....Ioane 10:9

- iv. O a'u le leoleo mamoe lelei...Ioane 10:11
- v. O a'u nei o le toe tu ma le ola.....Ioane 11:25.
- vi. O a'u nei le ala, upu moni ma le ola....Ioane 14: 6
- vii. O a'u nei o le vine moni....Ioane 15:1

FESOASOANI:

1. *O a'u o le areto o le ola.* O loo talanoa Iesu i le itu faaleagaga o le tagata. O ia o le areto o agaga. E faapei ona maona i areto e tali ai le manava i le fiaai, e faapena foi ona malie le ola faaleagaga pe afai e talia Iesu Keriso.

2. *O Iesu o le malamalama moni lea.* E sososo le fetalaiga lea a Iesu ma le tala i le fafine mulilua lea na molia ane e tagata ia Iesu e faia i ai se faaiuga. Ua faateia i latou i le faapea atu o Iesu, o se ua leai se agasala ia muai togi se maa. O le faaiuga lea sa i o latou mafaufau, aua o le faaiuga lea faalutaia, i tu ma aga mataga faapea: o le fetogi i ma'a. Peitai, ina ua ta'u e Iesu le tala lea, na faafuasei ona latou o ese mai ia te ia. Ona ia faamalolo lea e Iesu ma faapea atu: aua e te toe agasala. Mulimuli ane, ua fetalai, O au nei o le malamalama o le lalolagi. Ua faamanino e Iesu le mafuaaga o le mulilua o le fafine ma le mafuaaga o le leai o se loto faamagalalo i tagata ia na latou molia mai le fafine. O le mafuaaga, ua leai se malamalama i o latou loto ma mafaufau. Aisea? E le talitonu ia Iesu. O le tagata e talitonu ia Iesu, e maua e ia le malamalama i le tino, o le mafaufau ae sili i le agaga, e fetuutuunai ai faaiuga fai ma fa'amuamua ai le alofa i soo se mea.

3. O Iesu o le faitotoa e ui atu ai mamoe i le lotoa. O uiga ia faaleoleo mamoe lelei. E tu i le gutu o le faitotoa, o mamoe uma lava e ui atu, e vaavaai totoa i ai le leoleo mamoe poo saogalemu atoatoa ao le lokaina le pa. Afai o i ai ni faaletonu poo ni ma'ila o le mamoe, e fofo e le leoleo mamoe. E faapena

le galuega a le Atua o loo faia mo i tatou o ana mamoe. O mamoe uma e ui atu ia te ia, e saogalemu ia. Aua afai e i ai ni faafitauli, e foia lava e le leoleo mamoe. Ao le mamoe e ese le faitotoa e ui ane ai, e iu ina mate pe afai e afaina lona tino aua ua le iloa e le leoleo mamoe.

4. O au o le leoleo mamoe lelei – faitau Salamo 23. O le tausiga faaleoleo mamoe a le Atua.

5. O a’u nei o le toe tu ma le ola. O le tali atu a Iesu ia Maria ma Mareta ina ua fetagisi ma aioi ia Iesu e faaola lo la tuagane o Lasalo. O le tali ua toe faamanino ai e Iesu le pogisa faaleagaga o Mareta ma Maria. Ua leva na nonofo ma mafuta ma Iesu peitai, e lei iloa lava o Iesu o le toe tu ma le ola. O le feau e le gata mo Maria ma Mareta ao le feau mo i latou uma na faalogologo i lea taimi. O le faamautinoaina o le pule ua ia Iesu, e oo a i le oti, e mafaia ona toe faatu mai e Keriso. Lea lava na pine i le toe faatauina o Lasalo.

6. O a’u nei le ala, upu moni ma le ola. O le a le uiga, o Iesu o le ala? Se auala laupapa poo se auala sima? O le uiga o ia upu, ua na o le tagata e talia Iesu i lona loto, o le tagata lena e sao i le ola e faavavau. E leai se isi ala tatou te maua ai le ola e faavavau, ua na o le talia o Iesu e fai ma faaola i o tatou olaga.

7. O a’u nei o le vine moni. Ua fa’aaogaina e Iesu se tasi o laau aoga i le siosiomaga o Iutaia e faamatala ai le faataoto lea. O le tagata e pipii i le Atua, o le pogai vine, e fua tele mai lona olaga i mea e lelei. Ao le lala poo le tagata e faatagapipii pe le pipii foi e iu ina mate.

Faamanatu: O Iesu Keriso o lo tatou ala lea i manuia o le Atua

.....

ASO SA: 4 NOVEMA 2018

MATAUPU: O LE MEA E LULUINA E LE TAGATA, E TOE SELESELEINA E IA:

TUSI FAITAU: Kalatia 6: 7

E i ai le talitonuga o lea ua tatou tu lalata i le faaiuga o le tausaga. O le vaitau o suega faaiu o le tausaga. O le vaitau, ua faaupuina e matua: o le vaitau o le seleselega.

FAATINOGA O LE MATAUPU:

1. Ia fetufaai le Autalavou i le manatu autu o le mataupu: poo ai latou te ioe e sa’o le manatu autu ao ai foi e tetee i le manatu autu.
2. Ia manino ni faataitaiga e lagolago ai manatu faaalua.
3. Fetufaai i le uiga o le feau a Paulo mo Kalatia – Kalatia 6: 7. Poo gafea o le soifua tauivi o le tagata o taoto ai le ataata o lea faamalosi a Paulo i le au Kerisiano.

FESOASOANI:

1. E ioe le mataupu i le manatu autu. O le mea lava tatou te lulu, tatou te toe seleseleina. Afai lava na lulu le onosai e fai meaaoga ma faamaoni e alu i le aoga, e selesele foi i le faaiuga manuia i le faaiuga o le tausaga.
2. Ae afai e le faamaoni, e maua foi se faaiuga manuia.
3. E tatau foi ona a’oa’oina le tupulaga talavou, i nisi o faiga le amiotonu o loo tutupu pea i vaitau nei o suega. O le tamaititi e lei mafaufauina e maua se faailoga, e tei a ua maua le faailoga, ona o faiga piopio ma le le amiotonu.

O le faamalosi a le tatou mataupu, aua nei popole pe masalosalo ai lou loto i le Atua. O le mea tonu lea o loo faamalosi ai Paulo i le au faatuatua i Kalatia. “*Aua nei faaseseina outou, e le ulagia le Atua..*” O loo faamalosi Paulo i tagata kerisiano, ona ua i ai le masalosalo ma le faalotolotolua i tagata o le Atua, ona o le tele o faiga piopio ma talaiga sese ua oo atu ia i latou. O le faamalosi a Paulo, aua tou te popole, e silafia e le Atua mea uma. O lou tumau i le faatuatua e tauia ai lava oe e le Atua i ona manuia. Ao le tagata e ola masalosalo i le Atua, e masalosalo foi lona taunu’uga.

O le au faatuatua uma e tasi lava le fa’amoemoe, o le ola e faavavau. O le tagata e faamaoni ma tutumau i le tala lelei, e maua e ia lea faamanuiaga. Afai e lulu le femoumoua’i, o le ola faafoliga ma isi uiga le lelei, e iu i le malaia.

Ia tatou mautinoa, e le ulagia le Atua. Afai ua ia fetalai e manuia le tagata e faamaoni, e mautinoa e moni ana folafolaga. O le faamanatu o lenei mataupu, ia tatou onosai i le ola tauivi ma le filiga. Onosai i faafitauli ma luitau o le ola tauivi, aua e le maua gofie se mea lelei. Afai o lelei ma sologa manuia le ola aoaoina, faafetai i le Atua. Ae afai o i ai ni faaletonu, o le autu lea o le tatou mataupu, faamalosi ma faalototele i le ua lagona le vaivai.

Faamanatu: E leai se mea e faigata i le Atua.

.....

ASO SA: 11 Novema 2018

MATAUPU: O FAATAOTO I LE MINA

TUSI FAITAU: Luka 19: 11-27

O le tasi lenei o faataoto o loo tele pea i ai finauga ma tusitusiga a le au suesue o le Tusi Paia i lona faauigaina. Ae taua foi lo tatou faitau ma sailiili i ai ma aumai nisi o finauga o i ai e faufau ai se tatou tali.

O fesili e faalautele ai le Mataupu:

1. O le a se faauigaina o le faataoto i lau faitau?
 - a. O ai lea e faatatau i ai le upu – alii i le faataoto?
 - e. O ai auauna ia e taua?
2. O le a le uiga o le – mina e pei ona taua?
3. O ai tagatanuu?

FESOASOANI:

1. O le alii na alu mamao:
 - a. O le tele o suesuega o loo faatusa ai le alii lea na alu mamao ia Iesu. O le alu ma le toe foi mai, ua faatusaina i le afio o Iesu i le lagi ma le toe foi mai i le aso o le faamasinoga mo tagata uma.
 - e. Peitai, o loo teena e nisi lea mau. Fai mai i latou, o Iesu e le tau alu mamao e saili se ao e avea ai o ia ma tupu, aua o Iesu o le tupu. Na afio mai lava i le lalolagi ma lona mamalu o ia o le Tupu.
 - i. O loo teena foi e nisi lea talitonuga o Iesu o loo faatusa i ai le alii lea na alu mamao. f. 21, o loo taua ai le tali a le auauna lona 3. Na ia faapea ai o le alii o se tagata e faigata tele, *e fiafia e selesele i saito na te le'i luluina*. O lea ua faamanino e le

auauna, o le alii o se tagata aiafu. E fiafia e maua le tamaoaiga mai se tulaga le lelei. Ae le faapena Iesu Keriso.

2. O auauna:

Ua talia lautele lava, o auauna o tagata uma ua talitonu ia Iesu. Ina ua alu ese Iesu, na ia tuu atu i le au soo poo le au faatuatua mina e galueaina mo se faasiliga. Ae mulimuli ane ua faia le faamasinoga e iloa ai le tagata ma lona tau.

3. O le mina:

a. O loo ua talia lautele foi, o le mina o le faatusa lea o taleni ma agavaa na tuuina e le alii i ana auauna mo se faasiliga.

e. O nisi ua latou faatusa le mina i le tala lelei, o le tiute o tagata talitonu i le Atua, o le galueaina lea o le mina poo le tala lelei ina ia tupu ma ola ae lei toe afio mai le alii poo Iesu.

i. Peitai, o loo finauina e nisi o le mina- o le tupe. O le mina e tusa o suesuega, o le mina o le totogi lea o le tagata faigaluega i Palesitina mo le 3 masina. O le isi suesuega o loo iloa ai, o le mina e tutusa lona tau ma le 100 tenari, ao le 1 le tenari le tau o le tagata faigaluega Roma i le aso e tasi. O le faatonuga a le alii ina ia ‘ faatauai seia toe sau’ –f13, o loo manino ai le faauigaina o le fefaatauai poo le fai pisinisi e fa’aaoga ai le mina poo le tupe.

o. f.23 o loo taua ai le ‘fale e faatau ai tupe’. O loo faatatau upu ia a le alii, i le laulau (bench) lea e faaliliu ai tupe ao lei faia fefaatauiga. O lona uiga, e tatau ona faaliliu muamua tupe Roma ma isi tupe i le tupe Eperu – sekeli (shekel), ona faatoa mafai lea ona fai ni fefaatauiga o oloa. Ao le faaliliuina lea o tupe i luga o le laulau (bench) lea e maua ai tupe faasili.

Uiga o le Faataoto:

Ua faatatau e Iesu leni faataoto, i le tatau ona galueaina le tupe mo se faasiliga. O le faasiliga, e mafai ai ona faatino isi galuega. Ma ia maua ai se foai mo le Atua ma lona finagalo. A le galueaina le tupe ma fefaatauai e le maua se faasiliga mo le faatinoina o le tautua i soo se ala.

Faamanatu: E le leaga le tupe, ao le tuinanau o le tagata i le tupe, e mafua ai ona leaga.

.....

ASO SA: 18 NOVEMA 2018

MATAUPU: O TUSITUSIGA I LE PALAPALA

TUSI FAITAU: Ioane 8: 1-11

O le tala ua masani ai le faalogo ma le faitau, o le tala i le tali a Iesu ia i latou na o latou momoli ane le fafine mulilua mo sana faaiuga. Peitai, na tali Iesu ma faapea atu: *“O so outou e leai sana agasala, ia lua’i togi se maa ia te ia. Ona toe punou lea o ia, ma tusi i le elele.”* O le iuga e leai ma se isi na togi se maa, ae ua taitasi ma alu ese le tagata ia.

O FESILI MO LE AUTALAVOU:

1. Aisea ua taapeape ai tagata ina ua tali atu Iesu?
 2. O a upu ia e tusi e Iesu i le palapala?
- (Ia manino ma malamalama le fetufaaiga).

FESOASOANI:

E le o taua i le Tusi Paia, ni tali manino o fesili ua amata ai le mataupu. Ao le faataua o manatu, ia fetufaai le Autalavou i ni tali e mafai ona faamalieina ai le fesili.

O tali ia a nisi o le au suesue o le Tusi Paia:

1. Ua vaavaai atu i latou nei, ua tusia e Iesu tulafono e 10 i le palapala. Ua latou vaavaai atu, e leai a se isi o latou e sao mai ia tulafono. Aua o lea ua latou faamamalu le tulafono a Mose - o le sa le mulilua ma lona faasalaga o le tauai i maa. Ao lea ua tusi e Iesu isi tulafono i le palapala, ma peiseai ua faapea atu Iesu, a faamamalu la le mulilua ma lona faasalaga, ae faapefea le gaioi, o le molimau pepelo, o le soli le sapatu ma isi tulafono? O ai o outou o sao mai ia tulafono. O le tagata e leai sana agasala, togi ia se maa. E leai ma se isi na toe tali, ae ua taapeape taitoatasi.

2. Ua tusi e Iesu atoaga o le solitulafono lenei o le mulilua i le palapala. O le soli tulafono, e tatau ona aumai faatasi le fafine ma le tane. Ao lea ua aumai na o le fafine. Ua faateia i latou i le tusi e Iesu, o le atoaga o lea tulafono: O fea o i ai le tamaloa na mulilua i ai le fafine? O upu ia na tusia e Iesu, na mafua ai ona taapeape i latou. Ina ua latou iloa e le tatau ona faasala le fafine aua e le o atoatoa le moliaga ua faia.

3. O nisi o le au suesue o loo finau e faapea: e fesootai le tusitusiga lea a Iesu ma upu o loo tusia i le Ieremia 17:13. *Le Alii e, le fa'amoemoe o Isaraelu, e faamamaina i latou uma o e lafoai ia te oe, o i latou e liliu ese ia te au e tusi i latou i le eleele, aua ua lafoaiina e i latou ole Alii, le puna o vai ola.* O lenei finauga, o loo faapea mai, ua le iloa e tagata o Iesu o le puna o vai ola. Ana iloa semanu latou le tofotofoina Iesu i lea fesili.

4. O nisi o loo finau ma faapea mai o lea ua toe tusi e Iesu le isi tulafono e ese mai le tulafono a Mose. O le tulafono a Mose o

loo manino i le Teuterenome 22 – le mulilua ma lona faasalaga. Peitai, o lea ua tali Iesu: a i ai se isi e leai sana agasala ia muai togi sana ma’a. O le vaai a tagata ia e tutu ma maa, o lea ua toe tusi e Iesu le isi tulafono. E faapei ona tusi i papa mama i le aao o le Atua, o lea foi ua toe tusi e Iesu i lona aao i le palapala. O le mafuaaga lea o le o ese o ia tagata. Ina ua latou iloa e le tutusa le tulafono a Mose ma le tulafono a Iesu.

O loo faia pea finauga ma sailiiliga i le fesili: Poo a upu na tusia e Iesu i le palapala. Ae taua lo tatou talanoa ai, e ui e le o matua manino se tala mai le Tusi Paia.

Pe tatou te iloa upu na tusia e Iesu pe leai, o le mea taua ua:

1. Faasaoina le ola o le fafine semanu e fetogi i maa ma oti ai.
2. Ua faamagaloina agasala a le fafine mulilua.
3. Ua a’oa’oina mafaufau pogisa o le au faresaio ma i latou o loo taumafai e tofotofa le silafia o Iesu.

.....

ASO SA: 25 NOVEMA 2018

MATAUPU: O LE U’U NATO I TOTONU O LE FAGU ALAPASA

TUSI FAITAU: Mareko 14: 3-9

Fai mai le fesili a i latou na tiga o latou loto: “Pe se a le mea ua māumau ai faapea le uu manogi?”

O le fesili a le tagata manumanu, ua ia iloa le taugata o le uu manogi ma lona taua. O le tala masani i le galuega na faia e le fafine e faalupeina o le fafine agasala mo Iesu. Na le fiafia nisi o le au soo, ae tali Iesu: tuu ai pea ia ia te ia.

Tatou ma sailiili i lenei pe aisea ua manumanu ai le au so'o i lenei uu, ao le a foi sona aoga i le sosaiete o tagata Iutaia.

O nisi ia o fesili e faalautele ai le talanoaga o le mataupu:

1. O ai le so'o o loo faasea i le fafine?
2. O le a le taua o lenei uu manogi e mafua ai ona manumnau le au so'o?
3. O le a se a'oa'oga ua tatou maua mai lenei tala?

FESOASOANI:

O loo i ai le talitonuga o le au suesue o le Tusi Paia, o le so'o lea e fesili manumanu i le uu manogi, o Iuta le Sekara. O Iuta, o loo famauina, o le teutupe lea a Iesu ma ona so'o. O le vaai lea faateutupe a Iuta, a faatau le uu manogi lenei e tele lona tau e maua ai. A fua i le tau ua aumai, o le matuai taugata lava o lenei nato e pei ona uuina ai e le fafine talitane aao o Iesu.

a. Aisea e taugata ai le uu nato?

1. E eseese ituaiga uu manogi e maua i totonu o Isaraelu. E tele i uu taugofie, e gaosi lava i laau e maua i laufanua o Isaraelu. E lē gata i lea, a e gaosi gofie foi, auā e gaosi mai lau, ma pa'u o laau. Ao le uu nato, e saili gatā le laau lea o le nato. O se laau e lē ola i laufanua o Isaraelu ma Palesitina. E lē gata o se uu saili gatā, ae lē faigofie foi ona gaosi.

2. O isi uu e gaosi mai lau o laau, ma pa'u laau, ao le uu nato e gaosi mai le a'a o le laau. O lona uiga, o le galuega tele le tau eli a'e o ona a'a, ae faaeteete foi nei afaina le laau. E ui lā ina taugata le uu nato, a e tāua lona aoga.

e. O le aoga o le uu nato i tu ma aga faaIutaia.

1. O le uu e faauuina ai taitai o aiga, taitai o nuu, o taitai o malo.

2. O le uu e faamaufaailogaina ai feagaiga i le va o aiga, o feagaiga i le va o nuu, ma va o atunuu.

3. O se uu e teuteu ma faaleleia ai le va o se ulugalii. E faaleleia ai le va o matua ma fanau, o le va o aiga, o le va o nuu, ma atunuu.

O itu ia na manatu ai Iuta, e le tatau ona fa'aaogaina le uu nato e uu ai aao o Iesu, i lona lagona ua maumau le uu taugata ma le anagata.

E faaiu e Iesu le tala lea i le leaga o le ola manumanu ma le lelei o le ola e faamaumau ona o Ia ma lona finagalo. O le tagata e ola faamaumau mo Iesu, e manuia ao le tagata e ola manumanu e pei o Iuta, e iu vale lona taumafai.

A'oa'oga mai le tala:

1. *Ia tatae le fagu alapasa ona iloa lea o le manogi o le uu nato.* O le upu ua faaliliuina “tata’e,” o le “nuti lili’i.” O lona uiga, e lē mafai ona toe faafoi pe toe utu le uu. O le finagalo o Iesu, o le uu nato e le o se uu e faatuaomia sona aoga. O le uu e tele ma e aoga i mea uma. E ao ai ona tata’e le fagu alapasa, ma liligi le uu nato, ona aoga lea.

2. *O i tatou o le uu nato tautele a le Atua.* O le faamoemoe o le Atua, ia faasasala atu lo tatou manogi lelei, e ola ai nisi o loo tuufesilisili pea i le uiga o le Atua ma lona agalelei ma. Peitai, e lē mafai ona sasala pe afai na o le faapelepele i totonu o le fagu alapasa. O le finagalo o Iesu, ia tata’e le fagu alapasa. Tata’e le ola faamaualuga, le manatu faapito, le faamisa ma le isi uiga leaga, ona iloa lea o lo tatou tagata lilo lelei mo le viiga o le Atua. ..

Faamanatu: Ia fa'aavanoa o tatou loto e Afio tumau ai Iesu.

.....

ASO SA:

2 TESEMA 2018

MATAUPU:

**O TU MA AMIOGA FA'AALOALO
E TAUSISI I AI**

O lenei aganuu taua, ua tusa nei ma le fitu tausaga ua tuana'i, na avatu ai i mataupu o le Tusi Aoga Autalavou. Peitai, o loo vaaia pea ma maitauina amioga le fa'aloalo, ae mafuli lava i tupulaga talavou. E ao ai pea le toe faamanatu ma le taulogologo pea i autalavou, amioga fa'aloalo e tausisi i ai, aua le agai i le lumana'i.

1. Ia e iloa tula'i

- a) 'Aua e te tu i luga ma se ofuvae i totonu o se maota po o se laoa a'o fono ai ni matai.
- e) 'Aua nei e tu a'o afifio alii ma failauga i se maota po o se laoa.
- i) 'Aua e te tu ma tautala a o i ai ni tamalii ma failauga.
- o) 'Aua e te tu ma pisapisao o lata ane i alii po o se maota.
- u) 'Aua e te amotū se avega po o se uta i tala ane o se maota.

2. Ia e iloa savali.

- a) 'Aua e te 'ai savali i totonu o se nuu, po o i le alatele, po o i tafatafa o lou fale.
- e) 'Aua e te 'ai savali i totonu o le fale ma fealualua'i ai.
- i) 'Aua e te 'ai savali, pisapisao ma faaumū (Tuliususu), laulauvavale i totonu o le nuu, a o afifio ma faafofoga i ai tamalii ma le nuu atoa. (Ia manatua, e mamafa le ususu o se tagata i totonu o se nuu i le aganuu Samoa, o

lonauiga ua na soli le paia maualuga ma le mamalu o le afioaga, o loo afifio ai tupu ma tamalii ma Faleupolu).

o) ‘Aua e te soli tofaga.

3. *Ia e iloa nofo*

a) ‘Aua e te nofo faaloloa ou vae a o potopoto se saofaiga.

e) ‘Aua le faanapeina ou vae a o fai le saofaiga a matai.

i) ‘Aua le faatu ou vae i luma o matai

o) ‘Aua e te tietie i luga o nofoa, moega, laulau, pe afai o nonofo tagata i le maota po o le laoa.

f) O le nofoaga o tupulaga i totonu o maota ma laoa, o le itu i tua.

4. *Ia e iloa taoto.*

a) ‘Aua le faasaga ou vae i le itu o i ai tagata.

e) ‘Aua e te taoto ao fai se talanoaga aloaia po’o se mataupu i totonu o se maota/laoa.

i) ‘Aua e te taoto ma ‘ai, pe taoto foi ma inu.

o) ‘Aua e te taoto ma faatutu ou vae i se aofia.

u) ‘Aua e te taoto ao fai se suavai po o se galuega.

5. *Ia e iloa ai ma inu.*

a) ‘Aua e te ‘ai ma soa’ai i mea fono a alii, po o i’a sa.

e) ‘Aua e te ‘ai i tu’uga (inati) o ni faifeau po o ni malo mai fafo.

i) ‘Aua e te ‘ai na i mea e tujpu ai le faalumalumaina (puaa, moa)

o) ‘Aua e te ‘ai faananā (faaumuumu) ma tuu le tele o meaai i le taele o ‘ulo po’o ato.

u) ‘Aua e te ‘ai faatoaga (aitogi) faaotaota.

f) ‘Aua e te ‘ai i luma fale.

g) ‘Aua e te ‘ai muamua i le umu ae le’i avea le sua a le matai.

l) ‘Aua e te inu i se ava o alii, pe afai e te le’i matai.

m) ‘Aua e te ‘ai toe aina a le sa’o pe afai e te toto i ai i le suafa.

Ia silafia ma iloa lelei, o le aganuu a Samoa, e le toe ‘aina e nisi o le fanau totino ma le ‘aiga totino taumafa e totoe mai i le taliga sua a le matai (tamalii) o le aiga, e na o fafine nofo tane ma faiava latou te tausasami ai.

.....

ASO SA: 9 TESEMA 2018

MATAUPU: O LE TOE FOI O IUTA

TUSI FAITAU: Mataio 27: 3-10.

O fesili e amata ai le mataupu:

1. O se mea talafeagai le toe foi o Iuta e faatoese i le au osi taulaga sili pe leai? (fa’ailoa mai mafuaaga o lau tali)
 2. O lea sou taofi i le upu a osi taulaga sili i le fa’aaogaina o tupe ia na faalata ai Iesu?
 3. O sa’o le nofoaga lea na sulufa’i i ai Iuta: o le malumalu?
- * Ia faamaumau lelei tali ma finagalo fa’aalia o le Autalavou mo se faaiuga mulimuli ane.

FESOASOANI:

1. O Iuta le Sekara, o loo taua muamua o le teutupe lea a Iesu ma ona soo na i ai. O loo finauga e le toatele, o lona naunau i le tupe na mafua ai ona alu i le au ositaulaga sili mo se tupe e faalataina ai Iesu.
2. Lea lava na taunuu lona manao. Peitai, ina ua vaavaai atu Iuta ua tulaga ogaoga le faasalaga o Iesu, o iina lea na toe

lagona ai lona sese ma toe foi i le au osi taulaga sili e toe faafoi tupe, i lona manatu, e toe faasaoina ai Iesu.

3. Peitai, o le tali a le au ositaulaga sili: “sa matou mea ea lena? Faitalia lava oe.” O se tali ua manino ai Iuta, o ia le faapogai o sauaga ua oo ia Iesu. O le iuga o le tala fai mai na pule Iuta i lona ola. Na sisi lona ua ma oti ai. E iloa ae e tagata ua palagia lona tino, ua toulou i fafo lona taulaga (sei tulou).

4. O le fia faatauaina e le tatou mataupu: **LE TOE FOI O IUTA**. O le toe foi a le tagata ua lagona lona sese ma ua salamo i le mea na ia faia. Peitai, e manatu le mataupu, e sese le nofoaga ma tagata ua saili i ai mo se tali o lona mafatiaga. Ua saili i le au osi taulaga sili, i le malumalu, ao i latou ia sa taumafai e faasala Iesu.

5. O loo taua i le fuaiupu e 6-10 le mea e tatau ona faaaoga i ai le tupe siliva ia na toe foi atu ma Iuta – faatau ai le fanua e tatanu ai tagata ese. O lo latou manatu, o le tauo le toto. E foliga mai i upu ma tala ua felafoai, e malamalama lelei a le au alii ia i le leaga o le latou mea na fai ae na fai a ona o le le fiafia ia Iesu.

6. O le malumalu i le vaaiga faalutaia, o i e sulu i ai le pagota poo le tagata ua agasala mo le faamamaina o ana agasala. Peitai, ua le faapena le tala ia Iuta. Ua leai se faamagaloina o toe maua i le malumalu, ua na o tagata taupulepule leaga e faaoo le oti ia Iesu.

7. E manatu le tatou mataupu, sa tatau ona toe foi Iuta e faatoese ia Iesu. Tusa lava poo ia na faalataina Iesu, e tatau lava ona toe foi ia Iesu, e maua ai le toomaga o lona mafatia. O Iesu, o ia o le malumalu mo le Atua. O le malumalu e sulu i ai le tagata agasala, e mautinoa e maua le mapusaga o lona faafitauli.

8. E taua i manatu le salamo o Iuta, peitai, ua sese le tagata ma le nofoaga ua sulu i ai mo se tali o ona mafatiaga.

Faamanatu: O Iesu e maua ai le mapusaga o soo se mafatiaga.

.....

ASO SA: 16 TESEMA 2018

MATAUPU: O MEAALOFA A LE 'AU MAKOI

TUSI FAITAU: Mataio 2: 9-11

O lenei vaitau o le tausaga, o le vaitau lava o faigameaalofa. E eseese foi faiga ma auala o faiga meaalofa i nei aso. A o le auga lava ma le faamoemoe ia faafiafiaina le loto o le tagata o loo i ai lea meaalofa. O le tala sa faitauina o le tala i le malaga mai o Makoi mai sasae e saili le nofoaga o fanau ai le tupu o tagata Iutaia (Mataio 2:2).

O fesili mo le Autalavou:

1. O ai tagata ua taua o Makoi ma latou galuega e faatinoina?
2. O gafea o le tala i le au makoi o iloa ai se galuega a le Agaga o le Atua?

FESOASOANI:

1. O Makoi (wise men) - o tagata e i ai le potu faapitoa latou te suesueina ma faauiga le so'otaga o vaaiga i le vanimonimo ma le fogaeleele po o *astrologists* i le faaperetania.
2. O nisi ia o vaaiga e manatu le mataupu o loo iloa ai le fesoasoani a le Agaga o le Atua:
 - a. E manatu le mataupu, o le Agaga o le Atua, na mafua ai ona le iloa e Herota le nofoaga na fanau ai le pepe. (Aua o loo fesiligia pe faapefea ona le iloa e Herota ao Peteleema i Iutaia lea e fanau ai).

e. O le Malaga na taitaiina e le fetu: Ao le fesili e faapefea e lenei fetu ona taitaiina le au makoi – o tagata atamamai.? O le fetu faatasi ma le Agaga o le Atua.

i. O le fetu na tu i luga o le fale o manu. O loo fesiligia le filifiliga a le au makoi e talitonu ai i le faasinoga a le fetu, aua o lea e saili le tupu, ao lea e faasino mai le fale, o le fale o manu. E faapefea ona talitonu le au makoi i le fale o manu?

o. O meaalofo na ave e le au makoi, o meaalofo e taugata ma anagata i lea vaitau. O mea lelei na foai mo Iesu.

Ae faapefea i tatou le Autalavou: O le a sau meaalofo mo Iesu i lenei tausaga?

GALUEGA FAATINO:

E manaia foi ae fai se faatinoga o le tala e faaiu ai lenei tausaga....



IA MANUIA LE KERISIMASI & TAUSAGA FOU 2019